

## JNUHUN VAHA NI TEE SAN MARCOS

*Jnūhun Juan tēe scuándute*

*(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Yāha quėjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

<sup>2</sup> Isaías, tēe ni nacani jnūhun Yaā Dios nde jehahán, súcuan ni tee de jnūhun Juan nuū tútu: Tají rí tēe nacani jnūhun ri cosnūú de ichi núú rō, návāha coo tūhva ñayuu jeē jinú rō, achí Yaā Dios jíin Cristo.

<sup>3</sup> Te tēe ún cana jee de nde nuū ñúhun téhé: Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de.

Achí Isaías. <sup>4</sup> Te Juan ni jinū de nde nuū ñúhun téhé, scuándute de ñayuu. Te cáhán de jíin i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i. <sup>5</sup> Te tāca ñáyuu región Judea jíin ñáyuu ñuu Jerusalén, ni quiijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

<sup>6</sup> Te sahma ñúhun Juan cúu ixi camello, te núhni ñin cinturón ñi chīji de. Te jeē técu de cúu tíca ndicuéhyí jíin ndúxi yocō. <sup>7</sup> Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuítí cúu ri nuū yā, ni jeē cuajníñu ri nuū yā vēsú ñin jniñu lúlí gá nájñuhun jeē cuíta ndeyí ri ndají rí

correa ndijēn yā. <sup>8</sup>Te ruhū chi jíin ndute scuándute ri rohó jíjnáhan ró, te Yaā ún chi nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

*Jeē ní jendute Jesús*  
(Mt. 3.13-17; Lc. 3.21-22)

<sup>9</sup>Te ni cuu jecu quivī, te Jesús ni quenda ya ñuu Nazaret ndañū Galilea, te Juan ni scuándute de ya ini yūte Jordán. <sup>10</sup>Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xinī yā, te cáa nájñuhun ñn paloma. <sup>11</sup>Te ichi ándiví ní cahān ñn jñuhun:

Máa ró cúu Sēhe ri jeē maní ndasí rí jíin, te yōhyo cúsiñ ni rī jíin ró, achí.

*Jeē ní jito ndee jexeén Jesús*  
(Mt. 4.1-11; Lc. 4.1-13)

<sup>12</sup>Yūcuán na te ni jinū Jesús nde nuū ñúhun téhé ní sáha Espíritu Santo. <sup>13</sup>Te uū xico quivī ni condee yā nuū ñúhun téhé un núu ín quiti yúcú. Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

*Jeē ní quejéé Jesús nácani ya jñuhun*  
(Mt. 4.12-17; Lc. 4.14-15)

<sup>14</sup>Yūcuán na te ná ni cachune de Juan vecāa, te ni jinū Jesús región Galilea, nácani ya jñuhun vāha ndese ndácu Yaā Dios jniñu. <sup>15</sup>Te ni cahān yā:

Je ni jinū quivī, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jíjnáhan ró, te candíje ró jñuhun jeē jnáma ya rohó. Achí yá.

*Jeē ní cana ya cuūn tēe jn# chācá*

*(Mt. 4.18-22; Lc. 5.1-11)*

<sup>16</sup> Te jíca Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájni# chācá cácuu de, te cásinga de ñunu de ini mar. <sup>17</sup> Te ni cahān yā jíin de:

Condiquīn ruhū na quíhín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

<sup>18</sup> Yūcuán na te ni castóo-ni de ñunu de, te ni candiquīn de ya.

<sup>19</sup> Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyūcú de ini barco de, cánachijn# de ñunu de. <sup>20</sup> Te suni ni cana ya de jeē cóndiquīn de ya. Te ni castóo-ni de tátá de Zebedeo ini barco un jíin mozo de, te ni candiquīn de ya cuango de.

*Jeē ní quenehen ya tachī ini #n tēe*

*(Lc. 4.31-37)*

<sup>21</sup> Te ni jinū yā jíin de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnūhun. <sup>22</sup> Te ni canaa ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndíso jníñu siquī ndihī. Te tēe cástéén tutu ley Yaā Dios, tu súcuan cástéén de. <sup>23</sup> Te ini vehe iī sinagoga ñuu un íne #n tēe jeē ñúhun tachī ini. Te ni cana cóhó de:

<sup>24</sup> ¿Naun vēji ní núū na jíjnáhan ná, Jesús ñuu Nazaret? ¿A vēji ní jéē snáā ni sáña, chí naún? Je jíiní na ndé #n cúu ní, chi Sēhe iī Yaā Dios cúu ní. Achí de.

<sup>25</sup> Te Jesús ni cahān xeēn yā jíin táchī ún:  
Casi yuhu ró te quenda ró ini de, áchí yá.

<sup>26</sup> Te tachī ún xeēn ni jehni yīhí téé ún. Te ni cana cóhó, te ni quenda ini de cuahān. <sup>27</sup> Te ndihi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A ñn jnūhun jéé cúu jeē yáha? Chi tēe yáha cújéhnū de jeē ndácu de jniñu nde nuū tachī te quéndacoo, áchí i.

<sup>28</sup> Te yachī ni jitē núu jnūhun Jesús cuahān ní cáhnu región Galilea.

*Jeē ní nasávāha ya naná chīsó Simón Pedro*

*(Mt. 8.14-15; Lc. 4.38-39)*

<sup>29</sup> Te ni quenda ya jíin de jíjnáhan de ini vehe iī sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. <sup>30</sup> Te naná chīsó Simón, catú ña yīhi quīji ña. Te ni cacastūhún de nuū yā jeē cuhú ña. <sup>31</sup> Yūcuán na te ni quindehe ya nuū catú ña, te ni jñi ya ndaha ña, te ni ndonehen ya ña. Te ni quenda-ni quīji ún ña, te ni sáha ña jeē ní cayeji de jíin yá.

*Jeē ní nasávāha ya cuehē ñayuu*

*(Mt. 8.16-17; Lc. 4.40-41)*

<sup>32</sup> Te ni quēe niāndii te ni cuaa. Te ni quecoo ñayuu jíin táca ñáyuu cácuñū jíin jéē ñúhun tachī ini. <sup>33</sup> Te táca ñáyuu ñuu un ní cacutútú i yéhyí un. <sup>34</sup> Te ni nasávāha ya cuehē ñayuu cácuñū tijni nuū cuehyí, te ni quenehen ya cuehē tachī un cuángoo. Te tachī chi je cájini un yá, te tu ní jéhe ya jnūhun jeē cástūhun ndé ñn cúu ya.

*Jeē ní nacani ya jnūhun región Galilea*

*(Lc. 4.42-44)*

<sup>35</sup> Te nehen ndasí ní ndonda ya, nde yínee gā. Te ni quenda ya cuahān sñn ya yatā ñúu nuū tú ñayuu,

te yūcuan ní jicān tahu yā. <sup>36</sup> Te Simón jín té cāhīn jín de, ni jenanducú de ya. <sup>37</sup> Te ni cananihīn de ya, te ni cacahān de jín yá:

Tāca ñáyuu cānanducú i níhīn, áchí de.

<sup>38</sup> Te máa yá ni cahān yā:

Sa suhva na quíhīn yō tāca gá ñuu íne yajni, návāha suni nacani ri jnūhun nuū i, chí jeē yūcuan ní quee rī. Achí yá.

<sup>39</sup> Te súcuan te ni jica cuu ya ní región Galilea, ni nacani ya jnūhun ini vehe īi sinagoga tācá ñuu, te ni quenehen ya tachī ini ñayuu.

*Jeē ní nasávāha ya ñn tē ndóho cuehyī stehyú  
(Mt. 8.1-4; Lc. 5.12-16)*

<sup>40</sup> Te ñn tē ndóho cuehyī stehyú, ni quee de ni jecuiñī yití de nuū yā, te ni cahān de jín yá:

Jíní na jeē cuu sáha ní jēē nduvāha ná, te núu cúní ni, áchí de.

<sup>41</sup> Te Jesús ni cundáhú ni yā de, te ni soó yá ndaha ya síquī de, te ni cahān yā:

Cúní rī. Te na ndúvāha ró, áchí yá.

<sup>42</sup> Te ná ni cahān yā súcuan, te ni nduvāha-ni tē ndóho cuehyī stehyú un. <sup>43</sup> Yūcuán na te nátají yá de quinhun de, te ni cahān níhin ya jín de:

<sup>44</sup> Ma cáchi cuiñi rō nuū ní ñn. Chí quisteén rō maá ró nuū sutú, te condahá ró jeē sócō rō nuū Yāā Dios síquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

<sup>45</sup> Te ni quenda de cuahān de, te ni quejéé de nācani de jnūhun nuū ndíhi ñayuu ndese ni nduvāha de. Te síquī yūcuan tuá ni cúu quívi Jesús tācá ñuu, chí cúchitú ndasí ñáyuu nuū yā. Te ni jica

ya yatā tācá ñuu nuū tu cúchitú ñáyuu. Te tāca lado ni quijicoo ñayuu nuū yā.

*Jeē ní nasávāha ya ñn tēe ndóho cuehyī ni łjin  
(Mt. 9.1-8; Lc. 5.17-26)*

## 2

<sup>1</sup> Te ni cuu jecu quivī, te ni quivī tucu Jesús ñuu Capernaum. Te ni cajini ñayuu jeē néne ya vehe. <sup>2</sup> Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i. <sup>3</sup> Yūcuán na te ni quecoo cuūn tēe nuū yā, cándiso de ñn tēe ndóho cuehyī ni łjin. <sup>4</sup> Te tu ní cúu quivīcoo de nuū yā siquī jeē chitú ñáyuu. Te ni cacao de siquī véhe, te ni canune de ndaā nuū ín ya, te yaū un ní cascúun de tēe cúhú, cátú de nuū ñn camilla. <sup>5</sup> Te ni jini Jesús jeē cácanđje de jeē cúu nasávāha ya tēe cúhú un. Te ni cahān yā jín tēe cúhú un:

Séhē, je íne cáhnu ni rī nuū tāca cuéchi ró, áchí yá.

<sup>6</sup> Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de siquī yā: <sup>7</sup> ¿Naun cáhán tēe yáha súcuan? Cáhán de jnūhun ndevāha jeē quití ni Yaā Dios, chi nasūu Yáā Dios cúu de jeē cóne cáhnu ni de nuū cuéchi. <sup>8</sup> Te ni jini Jesús jeē súcuan cájени ni de, te ni cahān yā jín de:

¿Naun cájени ni rō jeē cahán ndevāha ri? <sup>9</sup> Jeē uú jnūhun yáha, ¿ndé ñn yí gá cáa? ¿A jéē cahán rī jín tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuiñī te naquihin ró camilla rō, te caca ró, achi rī? <sup>10</sup> Te vijna te na stéén rī jeē maá rí, Yaā ní nduu tēe, ndíso jníñu ri ini ñayivī yáha jéē cóne cáhnu ni rī nuū cuéchi.

Yūcuán na te ni cahān yā jíin téé ni íjin ún:

<sup>11</sup> Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

<sup>12</sup> Yūcuán na te ni ndocuiñī-ni téé ún, te ni naquihin de camilla de, te ni quenda de cuahān de, jíto jíinúū ndihī ñayuu. Te ndívii i ni canaa ni i cájito i, te ni cacahān i jeē yóhyo váha Yaā cúu Yaā Dios. Te áchí i:

Ná tu coto cuiti yō ni ñin jniñu súcuan, áchí i.

### *Jeē ní cana ya Leví*

*(Mt. 9.9-13; Lc. 5.27-32)*

<sup>13</sup> Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steén yā jnūhun nuū i. <sup>14</sup> Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xūhun renta. Te ni cahān yā jíin de:

Condiquīn ruhū na quíhín yō.

Te ni ndocuiñī de, te cuahān de jíin yá.

<sup>15</sup> Yūcuán na te ni jehēn yā ni yeji yā staā vehe de. Te cuehē téé cástútú xūhun renta jíin inga téé cásáha cuēchi, suni cáyúcú de cáyeji de staā jíin Jesús jíin téé cáscuáha jíin yá, chi íyó cuéhē de jeē cándiquīn de ya. <sup>16</sup> Te téé cástéén tutu ley Yaā Dios jíin téé grupo fariseo, ni cajito de jeē yéji yā staā jíin ndihī tāca téé ún. Te ni cacahān de jíin téé cáscuáha jíin yá:

¿Naun yéji maestro rō jíin téé cástútú xūhun renta jíin inga téé cásáha cuēchi? áchí de.

<sup>17</sup> Te ni jini Jesús, te ni cahān yā jíin de:

Ñayuu cáhīyo váha, tu jini ñúhún i téé tájna, chi ñayuu cácuhū cúu jeē jini ñúhún. Te ruhū nasūu jeē véji ri cana ri ñayuu tú cuēchi, jeē cúu i nájnūhun

ñayuu cáhīyo vāha. Chi sa suhva vēji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yá.

*Jeē ní cacajñūhún de ya síquī jeē cóndite ní*  
(Mt. 9.14-17; Lc. 5.33-39)

<sup>18</sup> Te ni cuu ñin quivī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jēe cascuáha jíin grupo fariseo, tijni jínu cáhīyo ndite ni de. Te tēe cáscuáha jíin máá ní, ¿naun tu cásáha de súcuan?

<sup>19</sup> Te ni cahān Jesús jíin de:

¿A cuu condite ni de níní jēe iyó rí jíin de? ¿A cuu condite ni ñayuu cáhīin vico nándāha, te núu níní néne tēe nándāha? Chi núu néne tēe nándāha, te ma cúu condite ni i. <sup>20</sup> Te quee quivī jeē cújiyo tēe nándāha, te quivī ún chi condite ni i.

<sup>21</sup> Te ni cahān yā uū jñūhun yátá síquī jeē tu quíjnáhan jñūhun jeé jēe steén yā jíin táca jñūhun jengahán. Achí yá:

Ni ñin tu náchuhun ñin pedazo sahma jēe núu ñin sahma túhú. Chi núu súcuan te ndiyi pedazo jeé un, te tahndē gā jeé tuhú un, te nducáhnū ga nuū catáhdé un. <sup>22</sup> Te suni tu cáchuhun vino jeé ini ññi túhú. Chi núu súcuan te vino jeé un ndatá ññi ún, te naa vino jíin ññi. Jeē yúcuan cánuú jēe chúhun i vino jeé ini ññi jēe.

*Jeē ní cataxín de yoco trigo quivī ndétātú*  
(Mt. 12.1-8; Lc. 6.1-5)

<sup>23</sup> Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica

de cuahān de, te ni quejéé de cátaxín de yoco trigo cáyeji de. <sup>24</sup> Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñn jniñu quiṽi ndétátú. Achí de.

<sup>25</sup> Te ni cahān maá yá jíin de:

¿A tu ní cácahu cuiṽi rō tutu ndese ni sáha David, ñn quiṽi ní cumanī jeē cáji de, te ni jíi de sōco jíin tēe cáhīin jíin de? <sup>26</sup> Te ni quiṽi de ini vehe Yaā Dios. Te Abiatar ni cuu sutū cujéhnu ga. Te ni yeji de pan iī jeē yosó ndijin nuū Yaā Dios. Te tú na ley jeē cáji ni ñn tēe, chi máá-ni sutū cuu caji. Te suni ni jēhe de ni cayeji tēe cáhīin jíin de. Te tú na cuēchi ní íyo siquī de. Achí yá.

<sup>27</sup> Te suni ni cahān yā jíin de jíjnáhan de:

Tu ní jéconaā ñayuu jeē ndóho i nuū quiṽi ndétátú, chi ni jeconaā quiṽi un jēe ndétátú i. <sup>28</sup> Núu súcuan te ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiṽi ndétátú, áchí yá.

*Jeē ní nduvāha tēe ni ichī ndaha  
(Mt. 12.9-14; Lc. 6.6-11)*

### 3

<sup>1</sup> Te ni quiṽi tucu Jesús ini vehe iī sinagoga. Te yūcuan íne ñn tēe ni ichī ñn ndaha de. <sup>2</sup> Te tēe grupo fariseo cájito yuhu de ya núu nasávāha ya tēe un quiṽi ndétátú, návāha nihīn de cuēchi siquī yā. <sup>3</sup> Yūcuán na te ni cahān yā jíin tēe ni ichī ndaha ún:

Ndocuiñi te condichi rō mēhñu yáha, áchí yá.

<sup>4</sup> Te ni cajnūhun yá de jíjnáhan de:

¿Ndese cáhán ley siquī quivī ndétātú? ¿A jéē sáha vāha yó, chí sáha néé yó? ¿A jéē nasávāha yó ñáyuu je yajni cuu, chí sáha yó jéē cúu i? áchí yá.

Te máá de tú na vé ni cacahān de. <sup>5</sup> Te ni quitī ni yā ni jito ya nuū de jíjnāhan de, te ni cucuíhyá ni yā jeē níhni ni de. Te ni cahān yā jíin téé ni ichī ndaha:

Scáá ndaha ró.

Te ni scaá de, te ni nduvāha-ni ndaha de. <sup>6</sup> Yūcuán na te ni quendacoo tēe grupo fariseo, te ni casquíjnāhan de jnūhun jíin téé grupo Herodes siquī yā, ndese cahni de ya.

### *Jeē ní quecoo cuehē ñáyuu nuū yā yumar*

<sup>7</sup> Te Jesús cuahān yā nde yumar jíin téé cáscuáha jíin yá. Te cuehē ñáyuu región Galilea ni candiquīn i ya. <sup>8</sup> Te suni ñáyuu región Judea, jíin ñáyuu ñuu Jerusalén, jíin ñáyuu Idumea, jíin ñáyuu ichi núu cáne niāndii yūte Jordán, jíin ñáyuu región Tiro jíin Sidón, cuehē ndasí ñáyuu ni cajini jnūhun i jniñu jéhnū ni sáha ya, te ni quecoo i nuū yā. <sup>9</sup> Te ni cahān yā jíin téé cáscuáha jíin yá jeē na cóo tūhva in barco quivī ya, návāha ma chítú níhin ñáyuu cuehē ún xiin ya. <sup>10</sup> Chi cuehē ñáyuu je ni nasávāha ya, te jeē yúcuán vējicoo cuehē gā ñáyuu cándoho tāca núu cuehyī, te chítú níhin i xiin ya jeē quehé i ya cácuni i. <sup>11</sup> Te ñáyuu cáñuhun tachī ini, núu ni cajito nuū yā, te cájecuñī yití núu yā, te cácana cóhó:

Máá ní cúu Sēhe Yaā Dios, achí.

<sup>12</sup> Te ni ndacu níhin ya nuū tachí un jéē ma cáhán gā jeē cúu ya Sēhe Yaā Dios.

*Jeē ní nacāji ya uxī uū tēe apóstol  
(Mt. 10.1-4; Lc. 6.12-16)*

13 Yūcuán na te ni caa ya cuahān yā ñin yucu. Te ni cana ya tāca tēe jeē cuní maá yá caca jíin yá, te ni quecoo de nuū yā. 14 Te ni jeni ya uxī uū de jeē cuíñi de jíin yá, te tají yá de quingoo de nacani de jnūhun. 15 Te ni sáha ya jeē cóndiso jníñu de nasávāha de ñayuu cuhú te quenehen de tachī ini ñayuu. 16 Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. 17 Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jnūhun, nájjnūhun yíhi fuerza taja. 18 Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, 19 jíin Judas Iscariote, tēe jeē ní nastúu de ya.

*Jeē ní cacahān ñayuu jeē jejniñu ya fuerza Satanás (Mt. 12.22-32; Lc. 11.14-23; 12.10)*

Yūcuán na te ni quívi ya ñin vehe jíin tēe cáscuáha jíin yá un. 20 Te ni ndutútú tucu cuehē ñayuu, te ni tuá ni cúu caji yā staā jíin de. 21 Te tāca jnāhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cacahān de jeē ní sana xinī yā.

22 Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñūhun Satanás ini de, jeē cujéñu nuū tachí. Te jíin fuerza un quénehen de tachī, achí de.

23 Te ni cana ya de jíjnāhan de, te ni cahān yā ñin jnūhun yátá jíin de:

¿Ndese cuu quenehen Satanás maá? 24 Chi núu ñin nación sásñin máá te cuajnáhan máá, nación un má cúu ga coyūcu cáhnu. 25 Te núu ñayuu ñin vehe

sásin máá te cuajnáhan máá, ñayuu un má cúu ga coyūcu cáhnu. <sup>26</sup> Te suni súcuan Satanás jín jnáhan tachī, chí núu sásin máá te cuajnáhan máá, núu súcuan te ma cóo ga, chí sa suhva naa.

<sup>27</sup> 'Te ni ñn tēe ma cúu quivi de ini vehe tēe ndacuī jeē quenehen de ndajníñu de. Chí cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quenehen rī tachī.

<sup>28</sup> 'Te jendaá cahán rī jín ró jeē iyó modo coo jnūhun cáhnu ni nuū tāca cuéchi cáśáha ñayuu, te suni nuū tāca jnúhun néé cácahān i. <sup>29</sup> Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chí sa suhva condee cuéchi siquī i ní cáni, áchí yá.

<sup>30</sup> Súcuan ni cahān yā, chí ni cacahān i jeē quenehen ya tachī jín fuerza Satanás.

*Náná yā jín ñani yā*  
(Mt. 12.46-50; Lc. 8.19-21)

<sup>31</sup> Yūcuán na te ni quee naná yā jín táca ñani yā. Te ín ña nuū quéhe, te ni tají ña jnūhun cuahān nuū yā jeē cána ña ya. <sup>32</sup> Te ñayuu cáyūcu ní xiin ya, ni cacahān i jín yá:

Náná ni jín táca ñani ni cáhīn nuū quéhe, te cácuñi cahān jín ní, áchí i.

<sup>33</sup> Te ni cahān maá yá:

¿Ndé ñn cúu náná rī jín ñani rī? achí yá.

<sup>34</sup> Yūcuán na te ni ndacoto ya nuū ñáyuu cáyūcú xiin ya ún, te ni cahān yā:

Suni náná rī jín ñani rī cácuu tāca ñáyuu yáha.

<sup>35</sup> Chí tāca ñáyuu casquícu jniñu cúní Yaā Dios, suu cácuu ñani rī, cuāha rī, náná rī, achí yá.

*Jnūhun yátá síquī tēe jéte trigo*  
(Mt. 13.1-9; Lc. 8.4-8)

## 4

<sup>1</sup> Te yumar ni quejéé tucu Jesús steén yā jnūhun. Te ni cutútú cuéhē ndasí ñáyuu nuū yā, te jeē yúcuan ní quīvi ya ni cucōo ya ini ñn barco nuū mar. Te tāca ñáyuu un cáyūcú i yumar. <sup>2</sup> Te jíin jnūhun yátá ni steén yā cuehē jnūhun nuū i, te súcuan ni cahān yā:

<sup>3</sup> Cuni nahín jíjnáhan ró: ñn tēe cate trigo, ni quenda de jeē cáte de. <sup>4</sup> Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayeji tī. <sup>5</sup> Te jecu gā trigo ni jitē nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun. <sup>6</sup> Te nuū ní cane niāndii, te ni ichī-ni, te ni casun, chi tu ní níhín nuū quihín yoho. <sup>7</sup> Te jecu gā trigo ni jitē nuū náne iñu. Te ni jehnu iñu ún, te ni jesi nuū, te tu ní jéhe nunī. <sup>8</sup> Te jecu ni jitē nuū ñūhun váha. Te ni cane, te ni jehnu, te ni jēhe cuehē nunī. Sava ni jēhe ocō uxī jeē ñn ñn nunī, te sava ga ni jēhe unī xico, te sava ga ni jēhe ciento. Achí yá.

<sup>9</sup> Yūcuán na te ni cahān yā jíin de:

Tāca rōhó jēé jíini sōho, na chúsóhó ró. Achí yá.

*Najehē cahán yā máni jnūhun yátá*  
(Mt. 13.10-17; Lc. 8.9-10)

<sup>10</sup> Yūcuán na te ni quendōo máá na yā, jíin ndihúxí uū tēe cáscuáha jíin yá, jíin jecu gā ñayuu cáhīin jíin de. Te ni cacajñūhún de ya na vé cuní cahān jnūhun yátá un. <sup>11</sup> Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīn sīn siquī, chi máni jíin jnúhun yátá cáhán rī tāca jnúhun jíin i. <sup>12</sup> Súcuan cáhán rī návāha vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

*Jeē ní castūhun cájí yá jnūhun yátá téé jéte trigo  
(Mt. 13.18-23; Lc. 8.11-15)*

<sup>13</sup> Te ni cahān gā yā jíin de jíjnāhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gá jnūhun yátá núu súcuan?

<sup>14</sup> Tēe jéte trigo cúu tēe scuíté núu jnūhun Yaā Dios.

<sup>15</sup> Te trigo jeē ni jítē yuhíchi cúu nájnūhun ánuá sava ñayuu. Chi cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i. <sup>16</sup> Te trigo jeē ni jítē nuū ñūhun yuū, chi cúu nájnūhun ánuá sava ñayuu cájini nahín jnúhun, te yachī-ni cájetáhú i te cácusī ni i jíin. <sup>17</sup> Te tu cúcutú jnúhun ún ini anuá i, te jecu-ni quívi cájetáhú i. Te núu ni quejéé jnúndóho, chí jító xeēn ñayuu i siquī jnúhun ún, te quejéé nácani yátá ni i. <sup>18</sup> Te jeē ni jítē nuū náne iñu cúu nájnūhun jecu gā ñayuu. Chi vēsú ni cajini sōho i, <sup>19</sup> te cándihvī ni i siquī jeē iyó ini ñayīvi yáha. Te cácuni i cucúcá i, te stáhú un i jeē cutóo ni i siquī tācá ndajníñu. Te ndihi jeē yáha cácuñéñu i jíin, te jési nuū jnúhun ya, te tu íje i jíin jnúhun ya. <sup>20</sup> Te trigo jeē ni jítē nuū ñūhun váha cúu nájnūhun ñayuu cájini nahín jnúhun, te cájetáhú i, te cáhije i jíin jnúhun ya. Te sava i cúu nájnūhun nunī

jeē jéhe ocō uxī jeē ñn ñn, te sava i jéhe unī xico, te sava ga i jéhe ciento. Achí yá.

*Jnūhun yátá síquī lámpara  
(Lc. 8.16-18)*

<sup>21</sup> Suni ni cahān yā jín de:

Núu nástñn ñayuu ñn lámpara, ¿a chūne i chíji ñn cajón chí chíji jīto? Tuú, chí jéni i nuū sucún návāha cundijin. <sup>22</sup> Te suni súcuan, tu íyó ni ñn jnūhun sāhi jéē ma cúni ñayuu, chí ndñhi tāca jnūhun natūu ndijin te cuni ñayuu. <sup>23</sup> Tāca rōhó jéē jínī sōho, na chúsóhó ró, achí yá.

<sup>24</sup> Te suni ni cahān yā jín i:

Cuni sōho vāha ró. Chí cūhva jeē chusóhó ró jnūhun Yaā Dios, suni cūhva un cuáha ya nuū rō, te víhyá gā cuāha ya nuū maá ró jeē chusóhó váha ró. <sup>25</sup> Chí ñayuu je jécūhun ni, stéen gā yā nuū i. Te ñayuu tu cándije, máá jecu jeē jiní i ún, sa suhva naa. Achí yá.

*Jnūhun yátá síquī trigo jeē jéhu*

<sup>26</sup> Te ni cahān gā yā:

Súcuan cúu jeē ndácu Yaā Dios jniñu nuū ñáyuu: Cúu nájñūhun trigo jeē ní jete ñn tēe. <sup>27</sup> Yūcuán na te quíxí de te ndónnda de, te súcuan jíca quivī cuahān. Te trigo un cáne te jéhu. Te máá de tu jiní de ndese cúu jeē jéhu. <sup>28</sup> Chí máá ñuhun sāha jeē jéhu trigo, xīhna gā yucū, sáá te cáne yoco, yūcuán na te íje máá núnī. <sup>29</sup> Te núu ni cuaan trigo un, te quéjéé ñáyuu cájehnde i, chí je ni jinū quivī tahndé. Achí yá.

*Jnūhun yátá síquī ndiquin mostaza  
(Mt. 13.31-32; Lc. 13.18-19)*

<sup>30</sup> Te suni ni cahān yā:

Na cāhān rī ñn jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. <sup>31</sup> Ndúcuehē i nájñūhun jéhnū ñn ndiquin mostaza jeē jéquin i nuū ñúhun. Te yūcuan cúu ñn ndiquin lúlí gá vēsú tācá ndiquin jeē iyó. <sup>32</sup> Te ná ni jequin i, te cáne te jéhnū ga vēsú tāca gá yucū, te cúnáhnū ndaha. Te tācá saa chí sáha tí tacā tí nuū cuándahū xinī ún. Achí yá.

*Jeē máni jnūhun yátá cāhān yā jíin i  
(Mt. 13.34-35)*

<sup>33</sup> Te cuehē jnūhun yátá súcuan ni cahān yā jíin ñáyuu, núu nasaa cánda i jecūhun ni i. <sup>34</sup> Te tāca jéē ni stéén yā, máni máá jnúhun yátá ní cahān yā jíin i. Te nuū tēe cáscuáha jíin yá chí ni nacastūhun cájí yá jnūhun ún.

*Jeē ní jecuññi tachī níhin jíin mar ni sáha ya  
(Mt. 8.23-27; Lc. 8.22-25)*

<sup>35</sup> Te jeē cuácuaa quivī ún, te ni cahān yā jíin tée cáscuáha jíin yá:

Na yáha yó quíhīn yō inga lado mar, achí yá.

<sup>36</sup> Te ni casquéndōo de ñayuu cuehē ún, te ni quivícoo de ini barco nuū je íne Jesús, cuangoo de jíin yá. Te suni cuangoo jecu gā barco jíin de jíinánhan de. <sup>37</sup> Te ni jecuññi ñn tachī níhin, te ni stónnda ndute mar, te ni quiví ini barco. Te je yajni chítú ndute ini barco. <sup>38</sup> Te Jesús cátú yá yatā de ini barco, quixí yā te yñi ñn sahma cástíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

39 Te ni ndocuiñī yā, te ni cahān yā nuū tachī níhin un jíin núū mar:

Jecuiñī te nayúú-ni coo ró, áchí yá.

Te ni jecuiñī tachī, te ni cuu nayúú íi-ni. 40 Te ni cahān yā jíin de jíjnáhan de:

¿Naun cáyūhú ndasí ró? ¿Naun tu cácandíje ró jéē cācu ró sáha ri?

41 Te yōhyo ni cayūhú de, te ni cacahān de jíin jnáhan de:

¿Nde ĩn ga cúu tēe yáha jéē nde tachī níhin jíin mar cájetáhu jéē cahán de? áchí de.

*Tēe Gadara jeē ndóho tachī  
(Mt. 8.28-34; Lc. 8.26-39)*

## 5

1 Te ni jinū Jesús jíin de jíjnáhan de inga lado mar, región Gadara. 2 Te ná ni quenda ya ini barco un, te ĩn tēe ñúhun tachī ini, ni quenda de nde nuū yíndūji ndīyí, te ni quee de nuū yā. 3 Tēe un ndéé de nuū yíndūji ndīyí. Te tu jéjníñu jeē jíhni ñayuu de, ni jíin cadena. 4 Chi cuehē jínu ni conuhnī jehē de ndaha de jíin cadena. Te tāca jínu jéhnde de, te sácuéché de. Te tú ni ĩn cúndeyí jíin de. 5 Te nduú ñuú jíca de yucu jíin núū yíndūji ndīyí, te cána cóhó de, te stújí de máa de jíin yúū. 6 Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. 7 Te ni cana cóhó de:

¿Naun vēji ní núū ná, Jesús Sēhe Yaā Dios, Yaā kujéhnu téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

8 Súcuan ni cahān de, chi je ni cahān Jesús: Táchī, quenda ini tēe yáha quíhīn rō.

9 Te ni cajnūhun yá de:

¿Na vé naní ró?  
 Te ni cahān de:  
 Legión naní ná, chi cuehē tachī ñúhun ini ná,  
 áchí de.

<sup>10</sup> Te ni cahān ndahú ndasí de jíin yá jeē ma tájí  
 yá tachī quendacoo región ún. <sup>11</sup> Te yajni yucu  
 yúcuán cáhīn cuehē quīnī cájitu tí. <sup>12</sup> Te tachī jeē  
 ñúhun ini tēe un ní cacahān ndahú jíin yá:

Núu tají ní sãñá, te cuāha ní jnúhun quīvicoo ná  
 ini quīnī yūcuán, áchí.

<sup>13</sup> Te Jesús ni jēhe ya jnúhun. Te ni quendacoo  
 tachī ún ini tēe ún, te ni quīvicoo ini quīnī, te íyó  
 nájnūhun uū mil tī. Te quīnī un ní cajinu tí ni  
 ñingoo tí ñn yucáva, ni quīvicoo tí nuū mar. Te ni  
 ndaquīhī tí ndute, ni cajihī tī.

<sup>14</sup> Te tēe cándito tí, ni cajinu de cuangoo de jeē ní  
 cayūhú de. Te ni jinūcoo de ni cacastūhún de nuū  
 ñáyuu ñuu un jíin ñáyuu tāca rancho. Te cuangoo  
 ñáyuu un cuácondēhé i na vé ni cuu. <sup>15</sup> Te ni jinūcoo  
 i nuū íne Jesús, te ni cajito i nuū tēe ni ñuhun cuehē  
 tachī ini. Te néne de, te ñúhun de sahma, te je  
 ni nducájí xínī de. Te ni cayūhú ñáyuu ún. <sup>16</sup> Te  
 tēe ní cajito, ni canacani de jnúhun nuū ñáyuu,  
 ndese ni nduvāha tēe ni ñuhun tachī ini, jíin ndese  
 ni candoho quīnī ún. <sup>17</sup> Yūcuán na te ni caquejéé  
 i cácahān ndahú i jíin yá jeē na cújiyo ya región  
 yūcuán quíhīn yā.

<sup>18</sup> Te ni ndīvī ya ini barco. Te tēe ni ñuhun tachī  
 ini un ní cahān ndahú de jíin yá jeē na cuāha ya  
 jnúhun quīhīn de jíin yá. <sup>19</sup> Te Jesús tu ní jēhe ya  
 jnúhun, chi ni cahān yā jíin de:

Cuánuhun vehe ró núu jnáhan ró, te nacani ró  
 jnúhun nuū i ndese yōhyo jéhnū jniñu ni sáha máá

Jítóho rō jín ró, te ndese ni cundáhú ni yā rohó, áchí yá.

<sup>20</sup> Te ni quenda de cuahān de, te ni quejéé de nácani de jñūhun tācá ñuu Decápolis ndese yōhyo jéhnú jniñu ni sáha Jesús jín de. Te ndivii ñayuu un ní canaa ni i cájini nahín i.

*Jñūhun sēhe síhí Jairo jín ñahan ní quehé yusáhma ya*

*(Mt. 9.18-26; Lc. 8.40-56)*

<sup>21</sup> Te ni nayāha tucu Jesús cuanuhun yā inga lado mar jín barco. Te ni quecoo cuehē ñayuu nuū yā, nuū íne ya yumar. <sup>22</sup> Te ni quee ñin tēe cújéhnú ini vehe ñi sinagoga, naní de Jairo. Te ná ni jito de nuū yā, te ni jecuiñí yití de nuū jehé yā. <sup>23</sup> Te ni cahān ndahú ndasí de jín yá:

Sēhe síhí ná je yajni cuu i. Na quíhín yō vehe ná te soó ní ndaha ní síquī i návāha na ndúvāha i te cotecu i, áchí de.

<sup>24</sup> Yūcuán na te cuahān yā jín de. Te cuehē ñayuu cándiquīn i ya, te ni chitú níhin i xiin ya cuangoo i. <sup>25</sup> Te mēhñu ñáyuu un cuáhān ñin ñahan cúhú, jeē ní cuu uxī uū cuiyā ndóho ña cuehyī niñí. <sup>26</sup> Te yōhyo ni ndoho ña, chí ni jexin ña tāca jéē névāha ña jín cuéhē tēe tájná, te tu ní jéjníñu jeē ndúvāha ña, chí sa suhva víhyá gā sáha. <sup>27</sup> Te ñahan yáha ná ni nihīn ña jñūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. <sup>28</sup> Chí ni jeni ni ña: Vēsú maá sahma ya na níhín rī quehé rí, te nduvāha rí, jeni ni ña. <sup>29</sup> Te ni jecuiñí-ni niñí ña, te ni jini ña jeē ní nduvāha ña cuehyī ún. <sup>30</sup> Te Jesús ni jini yā jeē ní nduvāha ñin ñayuu jín fuerza

yā. Te ni ndió cóto ya nuū ñáyuu cuehē, te ni cahān yā:

¿Ndé ñn ni quehé sahma ri? Achí yá.

<sup>31</sup> Te tēe cáscuáha jíin yá, ni cacahān de:

Jíto ní jéē ñáyuu cuehē yāha ní chitú níhin i xiin ní te cáquĩhi i níhín ñí cáni ichi, te cájnūhun ní ndé ñn ni quehé sahma ní.

<sup>32</sup> Te máa yá jíto ya cháha chúcuan, cúní yā jeē na cáchi ñayuu ni sáha. <sup>33</sup> Te ñahan un yúhú ña te quísi i ña, te je jíni ña jeē ní nduvāha ña. Te ni quee ña, te ni jecuiñi yití ña nuū yā, te ni cachi ña ndihí ndese ni cuu jíin ña. <sup>34</sup> Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuáhán te na ndúsñ ni rō, chi je ni nduvāha ró cuéhyi ní ndoho ró, áchí yá.

<sup>35</sup> Te níni cáhán gā yā súcuan, te ni quecoo ñayuu cáyūcú vehe tēe cújéhnú ini vehe ñi sinagoga, te ni cacahān i jíin de:

Je ni jihí sēhe síhí ní. Te ma sajnéñu ga ní Maestro, achí i.

<sup>36</sup> Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnú ini vehe ñi sinagoga:

Ma yūhu ró, chi candíje ró jéē nastécu rī i, áchí yá.

<sup>37</sup> Te tu ní jéhe ga yā jnūhun condiquīn ñayuu yā, chi máa-ni Pedro jíin Jacobo, jíin Juan ñani Jacobo. <sup>38</sup> Te ni jinū yā vehe tēe cújéhnú ini vehe ñi sinagoga, te ni jito ya ñayuu, cácuvaā i, te cándahyū i, te cácana cóhó i. <sup>39</sup> Te ni quiví ya, te ni cahān yā:

¿Najehē yōhyo cása vaā rō te cándahyū rō? Sūchi síhí yáha, tu ní jíhí i, chi quíxí-ni i, áchí yá.

<sup>40</sup> Te ni cajecū catá i jeē ni cáhān yā. Te ni quenehen ndihí ya i cuahān i nuū quéhe. Te ni

cana ya máá-ni tátá jíin náná sūchi síhí un, jíin tée cáhīn jíin yá, te ni quívi ya jíin de nuū catú súchi síhí ní jihī ún. <sup>41</sup> Te ni jñi ya ndaha i, te ni cahān yā jíin i:

Talita cumi, achí yá. Te jñūhun un cúní cahān: Síhī, cáhān rī jíin ró, ndocuññī, achí yá.

<sup>42</sup> Te ni ndocuññī-ni sūchi síhí un, te ni nacaca i, chí je íyó i uxī uū cuiyā. Te yōhyo ni canaa ni ñayuu cájito i. <sup>43</sup> Te ni ndacuññī-ni ya jñiñu nuū i jíin áhan i jeē ma cáchi cuiti i nuū ni ñn. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret  
(Mt. 13.53-58; Lc. 4.16-30)*

## 6

<sup>1</sup> Te ni quenda Jesús yūcuán, te cuanuhun yā ñuu yā. Te tée cáscuáha jíin yá cuango de jíin yá. <sup>2</sup> Te máá quívi ndétātu ní steén yā jñūhun ini vehe iī sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tée yáha tāca jñūhun yáha? ¿Te ndese cúu jeē cahán de jñūhun ndíchí yáha jíin jéē sáha de jñiñu jéhu yáha? <sup>3</sup> Chí tée yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáha. Achí i.

Te súcuan ni cacujéē ni i nuū Jesús. <sup>4</sup> Te ni cahān yā jíin i:

Tāca tée nácani jñūhun Yaā Dios, íyó yíñúhún ñayuu jíin de, chí máni ñayuu ñuu maá de, jíin jñáhan de, jíin ñayuu vehe de cúu jeē tu íyó yíñúhún jíin de. Achí yá.

<sup>5</sup> Te tu ní cúu sáha ya cuehē jniñu jéhnū yūcuán. Chi jecu-ni ñayuu cácuñū ni soó yá ndaha ya siquī i, te ni nasávāha ya i. <sup>6</sup> Te náa ni yā jíto ya jeē tu cácuñū ñayuu jijnáhan i. Yūcuán na te ni jica cuu ya tācá ñuu yajni, ni steén yā jñūhun.

*Jeē ní tají yá ndihúxí uū de cuanacani de jñūhun  
(Mt. 10.5-15; Lc. 9.1-6)*

<sup>7</sup> Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachī ini ñayuu. <sup>8</sup> Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chi máa vara-ni condahá de. <sup>9</sup> Te quihí de ndijēn, te ma quihín de jíin úū sahma, áchí yá. <sup>10</sup> Te suni ni cahān yā jíin de:

Na-ni vehe núu ni quivicoo ró, te yūcuán coyūcu ró ndé quenda tucu ró quihín rō inga ñuu. <sup>11</sup> Te núu ñuu tu cájetáhú i róhó, ni tu cúní i cuni nahín i jñūhun cahān rō, na quéndacoo ró yúcuán, te scóyo ró tícachā jehē rō, te súcuán steén rō jeē iyó cuéchi i jeē tu ní cájetáhú i. Jendaá cahán rī jíin ró jeē quivicoo juicio te xeēn gā coo castigo siquī ñuu casáha súcuán vēsú siquī ñuu Sodoma jíin ñuu Gomorra nuū ní casáha ndasí ñayuu cuéchi.

<sup>12</sup> Te ni quendacoo de cuahān de, te ni canacani de jñūhun jeē na nácani ni ñayuu jeē stóo i cuéchi i. <sup>13</sup> Te suni ni caquenehen de cuehē tachī ini ñayuu. Te ni cachihí de aceite cuehē ñayuu cácuñū, te ni canduvāha i.

*Jeē ni jíhī Juan tēe scuándute  
(Mt. 14.1-12; Lc. 9.7-9)*

14 Te rey Herodes ni jini jnūhun de jnūhun Jesús, chi ni jitē núu jnūhun ya nī cáhnu. Te ni cahān de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhnu. Achí de.

15 Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chi ñn tēe nácani jnūhun Yaā Dios cúu de, nájnūhun tēe ni canacani jnūhun ya nde jenahán, áchí i.

16 Te ná ni jini Herodes, te ni cahān de:

Tuú chi yúcuan cúu Juan jeē ní ndacu ri jniñu ni tahndē xinī, te ni natecu de núu súcuan, áchí de.

17 Chi máá Herodes ni ndacu de jniñu jeē na quívi Juan vecāa, jíin jéē na cónuhñi de jíin cadena. Súcuan ni sáha de jeē síquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. 18 Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

19 Te jeē yúcuan Herodías ni jito uhū ña Juan, te cúní ña jeē na cúu de, te tu ní níhín ña modo.

20 Chi Herodes yúhú de cahni de Juan, chi jíiní de jeē tēe ndaā tēe ndoo cúu Juan. Te jeē yúcuan ní jesí de jeē nducú ña jeē cúu Juan. Te nújnahan ni de jíiní nahín de jnūhun cáhán Juan, vēsú tu jécūhun vāha ni de. 21 Te ni quee ñn quívi jeē ní cundeyí Herodías. Chi ni sáha Herodes ñn vico quívi ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujeñnu región Galilea. 22 Te ni quívi sēhe síhí máá Herodías, ni jita jéhé i nuū chitú un. Te ni cacusñ ni rey Herodes jíin tēe cácuixíni jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

<sup>23</sup> Te ni cahān teyí de jeē cuāha de núu na vé cuní i cacān i, vēsú nde sava región jeē yíhi ndaha de.

<sup>24</sup> Te ni quenda i, ni jecajñuhún i náná i:

¿Na vé cacān na núu de? achí i.

Te ni cahān ña:

Xinī Juan tēe scuándute cacān rō nuū de, achí ña.

<sup>25</sup> Yūcuán na te ni ndīvi-ni i nuū rey, te ni cahān i:

Cúní na jēe vijna ñuhún-ni cuāha ní xinī Juan tēe scuándute, cone nuū ñn cohō, achí i jíin de.

<sup>26</sup> Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquí jeē ni jéjnūhun téyí de, jíin jēe ní cajini sōho tēe cáyeji staā jíin de, jeē yúcuán tu ní cúní de sásáhán de jeē ni jícān i. <sup>27</sup> Te ni tají-ni de ñn soldado jeē quíquihin de xinī Juan. <sup>28</sup> Te ni jehēn soldado un vecāa, te ni jehnde de xinī Juan. Te ni quee de jíin xinī Juan, íne nuū ñn cohō. Te ni jēhe de nuū sūchi síhí un, te máá i ni jēhe i nuū naná i.

<sup>29</sup> Te tēe cáscuáha jíin Juan ni canihīn de jnūhun, te ni jengoo de, ni candonehen de yíqui cúñu Juan, te ni cachindūji de.

*Jeē ni scáji yā uhūn mil tēe*

*(Mt. 14.13-21; Lc. 9.10-17; Jn. 6.1-14)*

<sup>30</sup> Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnúhun ni castéén de. <sup>31</sup> Te ni cahān yā jíin de:

Na quíngoo yó ñn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē caji yā staā jíin de. <sup>32</sup> Yūcuán na te ni quívi ya ñn barco jíin táca tée apóstol un, te cuangoo sún ya jíin de ñn lugar nuū tú ñayuu. <sup>33</sup> Te cuehē ñayuu ni cajito i jeē cuahán yā jíin de, te ni canacuni i jeē maá yá cúu. Te nde tācá ñuu ni quendacoo i, te yachī cuangoo i, te xīhna gā i ni jinūcoo vēsú maá yá. <sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájnūhun lanchi jeē tú jito ho tī. Te ni steén yā cuehē jnūhun nuū i. <sup>35</sup> Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. <sup>36</sup> Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

<sup>37</sup> Te ni cahān Jesús jíin de:

Cuāha maá ró jeē caji i, áchí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

<sup>38</sup> Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úu chācá íyó, áchí de.

<sup>39</sup> Yūcuán na te ni cahān yā jíin ñayuu jeē na cúcōo sún i cuenta grupo nuū íte. <sup>40</sup> Te ni cacucōo sún ciento ciento i, jíin cincuenta cincuenta i. <sup>41</sup> Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tée cáscuáha jíin yá, te maá de ni casaja de nuū ñayuu

cuehē ún. Te suni ni jēhe ya ndindúú chācá, ni casaja de nuū i. <sup>42</sup> Te ndivii i ni cayejí, te ni candutú chíji i. <sup>43</sup> Yūcuán na te ni canastútú de pedazo staā jíín cháca jēē ní quendōo, te ni chítú úxī uū jīca. <sup>44</sup> Te tēe ni cayejí, chi uhūn mil de cúu.

*Jeē ní jica jéhé yá nuū mar  
(Mt. 14.22-27; Jn. 6.16-21)*

<sup>45</sup> Yūcuán na te ni cahān-ni Jesús jíín tēe cáscuáha jíín yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natají yá ñayuu quinuhun i, te sáá te suni quihīn yā. <sup>46</sup> Te nuū ní cuu ni natají yá i, te ni caa ya yucu cuacacān tahu yā. <sup>47</sup> Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñúhun íchi. <sup>48</sup> Te ni jito ya jeē yóhyo jñundóho cáscáca de barco, chi nīhin vēji tachī íchi núú de. Te jeē yínee gā ni quee ya nuū de, jīca jéhé yá nuū mar. Te yāha ya nuū de quihīn yā núú. <sup>49</sup> Te ni cajito de jeē jíca ya nuū mar, te ni cajeni ni de jeē jihná cúu, te ni cacana cóhó de. <sup>50</sup> Chi ndihí de ni cajito nuū yā, te ni cayūhú ndasí de. Te ni cahān-ni ya jíín de:

Ndeyí coo ni rō, te ma yūhu ró, chi máá rí cúu, áchí yá.

<sup>51</sup> Te ni quívi ya ini barco un, te ni jecuíñi-ni tachī. Te yóhyo ni canaa ni de cájito de. <sup>52</sup> Chi cándāa néé gá jeē níjnūní de, chi ni jíín jniñu jéhnu jeē ní nducuehē staā, tu ní cájecūhun ni de jeē maá yá cúu Yaā ní tají Yaā Dios.

*Jeē ní nasávāha ya ñayuu cácuñu región Genesaret  
(Mt. 14.34-36)*

<sup>53</sup> Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. <sup>54</sup> Te nuū ní quenda ya jíin de ini barco, te ñayuu yúcuán ni canacuni-ni i ya. <sup>55</sup> Te yachī ni jengoo i tācá ndañúū yūcuán, te ni caquindeca i ñayuu cácuahū, cáyosó i nuū camilla, vējicoo ñayuu nuū ní jito i íne ya. <sup>56</sup> Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuahū yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha-ni i.

*Siquī ndese cújnehén ñayuu  
(Mt. 15.1-20)*

## 7

<sup>1</sup> Yūcuán na te tē grupo fariseo jíin jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. <sup>2</sup> Te tēe un ní cajito de jeē sava tēe cáscuáha jíin Jesús, ni cayeji jnehén de staā, chí tu ní cásquícu de costumbre jeē nándahá de nuū Yaā Dios. Te ni cacahān siquī de. <sup>3</sup> Chí tēe fariseo jíin ndihī ñayuu hebreo, névāha i costumbre jenahán jéē ma cáji i staā núu tu nandahá váha i xīhna gā. <sup>4</sup> Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquícu i, nájnūhun jeē ndúndoo taza, tīndohō, cohō cáa, jíin jító. <sup>5</sup> Te tēe fariseo jíin tēe cástéén tutu ley Yaā Dios, ni cacajnūhún de ya:

Tēe cáscuáha jíin ró, ¿naun tu cásquícu de costumbre ñayuu jenahán? Chí sa cáyeji jnehén de staā, achí de.

<sup>6</sup> Te ni cahān yā jín de:

Ndaā ni nacani Isaías jnūhun siquī rō jijnáhan ró jéē tēe stáhú-ni cácuu ró. Chi súcuan ni tee de jnūhun ni cahān Yaā Dios nde jenahán:

Ñayuu yáha chi máá yuhu-ni i cájetáhú i ruhū, te nasūu ndé jín ini jín ánuá i.

<sup>7</sup> Te cáchiñúhún sáá-ni i ruhū, chi jnūhun cástéén i cúu jniñu ní candacu tēe, te nasūu jéē ní ndacu máá rí cúu.

Achí Yaā Dios. Achí Isaías. <sup>8</sup> Súcuan cácuu ró, chi ni casiáá rō jniñu ní ndacu Yaā Dios nuū rō, te cásquícu ró costumbre jeē ní cajequin ñayuu, jeē ndúndoo tindhō jín taza. Te cuehē gā costumbre súcuan cásquícu ró, áchí yá.

<sup>9</sup> Te suni ni cahān yā:

Cásiáá rō jniñu ní ndacu Yaā Dios, návāha squícu ró costumbre ni cajequin máá ró. <sup>10</sup> Chi Moisés ni cahān de: Coó yíñúhún ró jín tátá rō jín náná rō. Te núu ndé ñn cahān siquī tátá chí síquī naná, na cúu nahín. Achí Moisés. <sup>11</sup> Te máá ró chi cácahān rō jeē cuu cahān ñn tēe jín tátá de náná de: Ma cúu chindéé ñáhán ná níhín cuáha na jéē cáji ni jéē cūhun ní, chi ndihí jeē névāha ná, chi Corbán cúu, áchí ró. (Te jnūhun Corbán cuní cahān jeē ni sócō nuū Yaā Dios.) <sup>12</sup> Te cácahān rō jeē núu súcuan cahān ñn tēe, te tuá cánuú chindéé ñáhán de tátá de náná de. <sup>13</sup> Te súcuan cástíví ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cásáha ró, áchí yá.

<sup>14</sup> Te ni cana tucu ya ñayuu cuehē ún, te ni cahān yā jín i:

Cuni sōho vāha ró jijnáhan ró, te chuhun ni rō:  
 15 Tāca jēe iyó, te núu ni quívi yuhu ñayuu te tu  
 cújnehén i sáha. Chi jeē quénda ini anuá ñayuu,  
 yūcuan cúu jeē cujnehén i sáha. 16 Tāca rōhó jēe jini  
 sōho, na chúsóhó ró, áchí yá.

17 Te ni stóo ya ñayuu cuehē ún, te ni quívi ya ini  
 vehe. Te tēe cáscuáha ún, ni cacajnúhún de ya síquī  
 jnúhun yátá yáha jēe ni cáhān yā. 18 Te ni cahān yā  
 jíin de:

¿A máa ró suni ná tu jecūhun ni rō, chí naún?  
 ¿A tu cájini rō jeē tāca jēe quívi ini ñayuu, ma cúu  
 cujnehén i sáha? 19 Chi tu quívi ini anuá i, chi chíji  
 i quívi, te quénda-ni cuahān, achí yá.

Súcuan ni steén yā jeē tāca jēe yéji ñayuu, tu  
 cújnehén ánuá i sáha. 20 Te ni cahān gā yā:

Jeē quénda ini anuá ñayuu, yūcuan cúu jeē cu-  
 jnehén i sáha. 21 Chi nde ini anuá ñayuu quénda jeē  
 jéni néé ni, jeē casíquí ndéē jnáhan, jeē jíca jnéni, jeē  
 jéhni ndīyi, 22 jeē sacuíhná, jeē ndíyo ni ndajníñu  
 jnáhan, jeē sáha néé, jeē stahú jnáhan, jeē máni  
 cuēchi sáha, jeē cucuésún ni, jeē cahán yāa síquī  
 jnáhan, jeē sandúxí máa, jeē canéé xínī. 23 Tācá  
 jniñu néé yáha, máni ini anuá ñayuu quénda, te  
 cújnehén i sáha, áchí yá.

*Ñahan inga nación jeē ní candíje nihin*  
 (Mt. 15.21-28)

24 Te ni quenda ya yūcuan cuáhān yā región Tiro  
 jíin Sidón. Te ni quívi ya ñin vehe, te cúní yā jeē tú  
 ni ñin ñayuu cuni jeē íne ya yūcuán. Te vēsú súcuan,  
 te tu ní cúu cone sáhi yá. 25 Te ñin ñahan íyó séhe síhí  
 ña jeē ñúhun tachí ini i, ni nihín-ni ña jnúhun jeē  
 íne ya. Te ni quee ña, te ni jecuíñi yití ña nuū jehé

yā. <sup>26</sup> Te ñahan ñuu jicá cúu ña, chi nde Sirofenicia cúu nación ña. Te ni cahān ndahú ña jíin yá jeē na quénehen ya tachī ini sēhe síhí ña. <sup>27</sup> Te ni cahān Jesús jíin ña:

Nasūu núu maá ní vēji ná, chi máni nuū ñáyuu cácuu sēhe Israel. Chi tu íyó váha jeē quénde yō staā sēhe te cuāha yó núu ína, achí yá.

<sup>28</sup> Te ni cahān ña:

Jendaá cahán ni Tátā, te chindéé ñáhán ní sáña vēsú cúu ná nájnūhun ina. Chi suni máá tí cáhīn tí chīji mesa, cánihīn tī staā cuechí jéē cóyo yuhu sūchi lúli cáyeji tī, achí ña.

<sup>29</sup> Yūcuán na te ni cahān yā jíin ña:

Váha ni cahān ní. Cuáhán ní núu súcuan, chi je ni quenda tachī ún ini sēhe síhí ní, achí yá.

<sup>30</sup> Te ni najinū ña vehe ña, te ni jito ña jeē catú sēhe síhí ña nuū jíto, te je ni quenda tachī ún ini i.

### *Jeē ní nasávāha ya ñn tēe sóhó cástété*

<sup>31</sup> Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea. <sup>32</sup> Te ni caquindeca i ñn tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquī de. <sup>33</sup> Te ni quenehen síin ya de nuū ñáyuu cuehē ún, te ni chune ya xinī ndáha ya sōho de, te ni tesīhi yá, te ni quehé yá yaá de. <sup>34</sup> Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

<sup>35</sup> Te ni nanune-ni sōho de, te ni nduvāha yáá de, te ni nacahān vāha de. <sup>36</sup> Te ni ndacu ya jniñu nuū ñáyuu un jéē ma cáchi i nuū ní ñn. Te vēsú ni cahān

nīhin ya jíin i, te víhyá gā ni cajete i jnūhun. <sup>37</sup> Te yōhyo ni canaa ni i cájito i, te ni cacahān i:

Vāha sáha ya tācá jniñu, chi nde tēe cásóhó, cánacuni sōho de, te tēe cándāa ñihín, cánacahān vāha de sáha ya, achí i.

*Jeē ni scáji yā cuūn mil ñayuu  
(Mt. 15.32-39)*

## 8

<sup>1</sup> Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

<sup>2</sup> Cúndáhú ni rī ñayuu yāhá, chi je ni cuu unī quiivī cáyūcú i jíin rí, te tuá na vé caji i. <sup>3</sup> Te núu natajǎ rí i quinhun ndite i vehe i, te cuíta í i sava ichi, chi íyó sava i jeē jicá véjicoo i, achí yá.

<sup>4</sup> Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chi yāhá tú na ñayuu yúcu, achí de.

<sup>5</sup> Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, achí de.

<sup>6</sup> Yūcuán na te ni cahān yā jíin ñáyuu cuehē un jéē na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahu cuéchí yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún. <sup>7</sup> Te suni cándiso de jecu chācá lúlí. Te ni nacuatáhú yá siquī, te ni cahān yā jeē suni saja de jíināhan de. <sup>8</sup> Te ndihí i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. <sup>9</sup> Te tēe ni cayejí un, íyó nájnūhun

cuūn mil de. Te ni nacuatáhú yá nuū ñáyuu ún, te cuanungoo i. <sup>10</sup> Yūcuán na te ni ndīvi-ni ya ini barco jíin tée cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhnú nuū yā*  
(Mt. 16.1-4; Lc. 12.54-56)

<sup>11</sup> Yūcuán na te ni quecoo tēe grupo fariseo, te ni caquejéé de stíchí de Jesús. Te cáconi de coto ndee de ya, te ni cajicān de jeē sáha ya ñn jniñu jéhnú jeē coo ñn seña ichi ándiví. <sup>12</sup> Te ni jitū ni yā siquī jeē tu cácandíje de jíjnáhan de, te ni cahān yā:

¿Naun cájicān ñayuu yáha ñn jniñu jéhnú nuū rī? Jendaá cahán rī jeē ma stéén rī ni ñn jniñu jéhnú nuū ñáyuu yáhá.

<sup>13</sup> Te ni squéndōo ya de jíjnáhan de, te ni ndīvi tucu ya ini barco, te cuahān yā inga lado mar.

*Jnūhun levadura tēe fariseo*  
(Mt. 16.5-12)

<sup>14</sup> Te tēe cáscuáha jíin yá ni canaa ni de condiso de jeē cáji de, chi ñn-ni pan cánevāha de ini barco.

<sup>15</sup> Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

<sup>16</sup> Te ni cacahān tēe cáscuáha un jíin táca jnáhan de:

Va siquī jeē tú na staā ndíso yó, jeē yúcuan cáhán yā súcuan, áchí de.

<sup>17</sup> Te ni jini Jesús, te ni cahān yā:

¿Najehē cándajnūhun ró jeē ni cáhán rī súcuan siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rī súcuan siquī jeē tu cándiso ró stáā? ¿A yóhyo uun ni rō candíje

ró? <sup>18</sup> Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō? <sup>19</sup> Chi ná ni tahu cuéchí rí uhūn staā ni cayejí uhūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:  
Uxī uū jīca, áchí de.

<sup>20</sup> Te suni súcuan ná ni tahu cuéchí rí uxā staā ni cayejí cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:  
Uxā jīca, áchí de.

<sup>21</sup> Te ni cahān yā jīn de:

Te nde vijna ¿á ná tu jecūhun ni rō jijnáhan ró?  
Súcuan ni cahān yatá yá jeē ma cándíje de jnūhun stáhú cástéén tēe ún.

*Jeē ní nasávāha ya tēe cuáá ñuu Betsaida*

<sup>22</sup> Yūcuán na te ni jinū yā jīn de ñuu Betsaida. Te ni caquindeca ñayuu ñn tēe cuáá núū yā, te ni cacahān ndahú i jīn yá jeē na tēe ya ndaha ya nuū de. <sup>23</sup> Yūcuán na te ni jñi ya ndaha tēe cuáá un, te ni quenehen ya de yatā ñūū ún. Te ni tee ya tesihí yá tñūú de, te ni tee ya ndaha ya siquī. Te ni cajnūhun yá de núu cuu coto de jecu. <sup>24</sup> Te ni ndacoto de, te ni cahān de:

Jító ná ñayuu jeē cájica i, te tu jító cájí ná, chi ná cáa yujnu cáa i, áchí de.

<sup>25</sup> Yūcuán na te ni tee tucu ya ndaha ya siquī tñūú de. Te ni ndacoto vāha de, te ni nduvāha-ni tñūú de, te ni jito cájí de ndihí-ni. <sup>26</sup> Te ni natají yá de quinhun de vehe de, te áchí yá:

Ma quívi ró ñuu, ni ma cáchi cuiñi rō nuū ní ñn, áchí yá.

*Jeē ni cáhān Pedro jeē Jesús cúu Cristo  
(Mt. 16.13-20; Lc. 9.18-21)*

<sup>27</sup> Yūcuán na te Jesús jíin tēe cáscuáha jíin yá, cuahān yā tācá ndañūū Cesarea Filipo. Te ichi un ní cajnūhun yá de:

Ruhū, ¿ndé ñin cúu ri cácahān ñayuu?

<sup>28</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun Yaā Dios cúu ní.

<sup>29</sup> Yūcuán na te ni cajnūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

<sup>30</sup> Te ni ndacu ya jniñu nuū de jíjnahān de jeē ma cáchi de jnūhun yáha nuū ní ñin ñayuu.

*Jeē ní castūhún Jesús jeē cúu yā  
(Mt. 16.21-28; Lc. 9.22-27)*

<sup>31</sup> Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jéhnu jíin sūtū cácujuhnu jíin tēe cástéén tutu ley, squéhichī de ruhū, te cahni de ruhū. Te nuū uní quivī te natecu rī, achí yá.

<sup>32</sup> Te cájí ní cahān yā jnūhun yáha. Yūcuán na te Pedro, ni cana máñuhún de ya, te ni quejéé de cáhān de nuū yā jeē ma cuáha ya jnūhun coo súcuan. <sup>33</sup> Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chí cáhān rō ná cáhān Satanás. Chí tu jéni ni rō nájnūhun jéni ni Yaā Dios, chí sa suhva jéni ni rō nájnūhun cájeni ni ñayuu, achí yá.

<sup>34</sup> Te ni cana ya tēe cáscuáha jíin yá jíin ñáyuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnūhun ndoho i jnūndóho jeē síquí rī, vēsú na cúū i. <sup>35</sup> Chi núu ndé ñáyuu cuní i cācu i nuū jnūndóho quiji nuū i jeē síquí ruhū, núu súcuan te jnahnū ndetū i nń cáni. Te núu ndé ñáyuu, vēsú na cúū i jeē síquí ruhū jíin síquī jeē scáca i jnūhun jeē jnáma ri ñayuu, núu súcuan te cotecu i nń cáni. <sup>36</sup> ¿Chi ndé cuajníñu vēsú na cúndeyí ñáyuu nihīn i nń ñáyīví, te núu quīví i nuū jnahnū ndetū i? <sup>37</sup> Chi tú na jíin cuiṭi chunaa ñayuu jeē cácu ánuá i. <sup>38</sup> Te ñayuu yáha tu cácañdeje cuiṭi i, te máni máa cuéchi cásaḥa i. Te núu na-ni ñayuu cúcanu i nuū ñáyuu yáha jeē síquí ruhū, Yaā ní nduu tēe, jíin síquī jnūhun cáhán rī, suni súcuan cucanu rī jeē síquí máa i, quīví ndíji ri jíin táca ndajéhé ndoo ri. Te quīví ún chi yōhoyo luu cujéhnu ri nájnūhun cújéhnu Tátá rī. Achí yá.

## 9

<sup>1</sup> Te suni ni cahān yā jíin de jíináhan de:

Jendaá cahán rī jíin ró jeē sava tēe cáhīin yāhá, ma cúū de chi nde cuni de jeē ndácu Yaā Dios jniñu jíin poder yā, achí yá.

*Jeē tucu ni nduu ya*

*(Mt. 17.1-13; Lc. 9.28-36)*

<sup>2</sup> Yūcuán na te nuū iñú quīví te Jesús ni jeca ya Pedro jíin Jacobo jíin Juan, cuahān sñn ya jíin de ñn yucu súcún. Te yūcuán, tucu ni nduu ya nuū de. <sup>3</sup> Te sahma ya ni ndindēé, te ni nducuíjín quiyi, nájnūhun yuhvā volcán. Te tú ni ñn ñayuu ñayīví

yáha cuu nacate jeē ndúquiyi ndasí súcuan. <sup>4</sup> Te ni cajito de jeē Elías jiín Moisés cándajnūhún de jiín yá. <sup>5</sup> Yūcuán na te ni cahān Pedro jiín Jesús:

Maestro, nacā jeē váha jeē cáhīn na yáha. Te na sáha ná únī vehe ramada, ìn cuu máá ní, ìnga cuu Moisés, te ìnga cuu Elías, achí de.

<sup>6</sup> Chi yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de. <sup>7</sup> Te ni quiji vicō nūhun ní jesi-ni nuū de. Te nuū vicó un ní cahān ìn jnūhun:

Yáha cúu Sēhe ri jeē maní ndasí rí jiín. Te na cúni nahín ró jnūhun cáhán yā. Achí.

<sup>8</sup> Te ni candacoto-ni de, te tuá tēe un ní cájito de, chi máá ìn na Jesús.

<sup>9</sup> Te ni cananuu de jiín yá yucu ún. Te ni ndacu nīhin ya jniñu nuū de jeē ma cáchi de nuū ní ìn jeē súcuan ní cajito de, chi nde na nátecu maá yá, Yaā ní nduu tēe, áchí yá. <sup>10</sup> Jeē yúcuan ní cachuvāha de tāca jēe ní cuu ún, te cácajnūhun jnáhan de na jnūhun cúu jeē nátecu yā. <sup>11</sup> Te ni cacajnūhún de ya:

Te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

<sup>12</sup> Te ni cahān yā:

Jendaá cúu jeē xīhna gā quiji ìn tēe cúu nájnūhun Elías, te sátūhva de ndihí, áchí tutu. ¿Te ndese cáhán tucu tutu ìi síquī ruhū, Yaā ní nduu tēe? Cáhán jeē ndoho xeēn rī, te sájéē ni i nuū rī. <sup>13</sup> Te cáhán rī jiín ró jeē jé ni quiji tēe ni cuu nájnūhun Elías, te ni casáha ndevāha ñayuu jiín de tāca jēe ní cacuu ni maá i, nájnūhun cáhán jnūhun de nuū tútu, áchí yá.

*Jeē ní nasávāha ya ñn sūchi ñúhun tachī ini  
(Mt. 17.14-21; Lc. 9.37-43)*

<sup>14</sup> Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúū i de. Te suni cáhīin tēe cástéén tutu ley Yaā Dios, cátejnáhan jíin de. <sup>15</sup> Te nuū ní cajito tāca ñayuu un jēē véji ya, te ni canaa ni i. Te cájinu i cuango i nuū yā jeē cahān i jíin yá. <sup>16</sup> Te ni cajnūhun yá i:

¿Na siquī cátejnáhan ró jíin de jíjnáhan de? áchí yá.

<sup>17</sup> Te ni cahān ñn tēe íne yūcuán:

Maestro, vendeca ná séhe ná núū ní, chi ñúhun ñn tachī ini i, te ni cuñhín i ní sáha. <sup>18</sup> Te ndé-ni cúu nuū íne i, te tachī un scótúú i, te jéhni yíhí-ni i. Te jée tiñū yuhu i, te squíhñi jnúhun i. Te cuacuxíí ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachī ún, te tu ní cúu sáha de, áchí de.

<sup>19</sup> Te ni cahān yā jíin de jíjnáhan de:

Ñayuu tu cándíje cuiiti cácuu ró. ¿Nasaa ga quiiví condee rī jíin ró? ¿Te nasaa ga quiiví cuandeyí ni rī jíin ró? Cuáquihin sūchí un, na quiíji i, áchí yá.

<sup>20</sup> Te ni caquindeca de i nuū yā. Te nuū ní jito tachī un núū yā, te ni jehni yíhí-ni i. Te ni cotúú i, te cónehén cócáni i, te jée tiñū yuhu i. <sup>21</sup> Te Jesús ni cajnūhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. <sup>22</sup> Te ni cuu cuehē jíinu scótúú táchí ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jēē ndúvāha sēhe ná, áchí de.

<sup>23</sup> Te ni cahān Jesús jíin de:

Núu cuu candíje ró jéē sāha ri, chi ñayuu candíje te cuu tāca jéē cuní i, áchí yá.

<sup>24</sup> Te máá tátá sūchí un ní cahān jee de:

Cándíje ná, te chindéé ñáhán ní sāña jéē candíje nīhin ga ná, áchí de.

<sup>25</sup> Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachī jeē sañhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

<sup>26</sup> Yūcuán na te ni cana cóhó táchī ún, te ni jehni yīhí tucu i, te ni quenda cuahān. Te sūchí un ní cuu i nájnūhun ndīyi. Te ni cacahān cuehē ñayuu jeē jé ni jihī i. <sup>27</sup> Te Jesús ni jnī ya ndaha i, te ni ndonehen ya i, te ni nucuññī-ni i.

<sup>28</sup> Yūcuán na te ni quívi ya ini ñn vehe, te tēe cáscuáha jíin yá, ni cacajnūhun sīn de ya:

¿Najehē tu ní cúu quenehen ná tachī un jíjnáhan ná? áchí de.

<sup>29</sup> Te ni cahān yā:

Ñn tachī súcuan chi ma quénda cuíti te núu tú cacān tahu rō te coo ndite ní rō, achí yá.

*Jeē ni cáhān tucu ya jeē cúu yā*

*(Mt. 17.22-23; Lc. 9.43-45)*

<sup>30</sup> Te ni quenda ya yūcuan jíin de jíjnáhan de, te ni yāha ya ndañúu Galilea cuahān yā. Te tu ní cúní yā jeē cúni ní ñn ñayuu. <sup>31</sup> Chi stéén yā nuū tēe cáscuáha jíin yá, te áchí yá:

Máá rí, Yāā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihī rī, te nuū uní quívi te natecu rī, achí yá.

<sup>32</sup> Te tu ní cájecūhun ni de jnūhun yáha, te cáyūhú de cajnūhún de ya siquī jnūhun ni cahān yā.

*Ndé ñáyuu cúu jeē cujéhnu ga*

*(Mt. 18.1-5; Lc. 9.46-48)*

<sup>33</sup> Te ni jinū yā jín de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

<sup>34</sup> Te tu ní cácahān cuiti de, chi ichi un ní cacahān de siquī núu ndé ñn de cújéhnu ga. <sup>35</sup> Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñn ró cúní cujéhnu ga, na cúu ró tée núu ga nuū tāca jnáhan ró, te cuajníñu ró núu jnáhan ró.

<sup>36</sup> Yūcuán na te ni jni ya ndaha ñn sūchi lúlí, te ni jeni ya i mēhñú de jínáhan de. Te ni nundee yā i, te ni cahān yā jín de:

<sup>37</sup> Na-ni ñayuu núu jeē siquí ruhū jetáhú i ñn sūchi lúlí nájnūhun sūchi yáha, te ruhū jetáhú i. Te ñayuu jetáhú rúhū, nasūu máá ñn-ni ruhū, chi suni Yaā ní tají rúhū jetáhú i, áchí yá.

*Ñayuu tu cáhán siquī yā, ín i jín yá*

*(Mt. 10.42; Lc. 9.49-50)*

<sup>38</sup> Yūcuán na te ni cahān Juan jín yá:

Maestro, ni cajito ná ñn tēe jeē jín shví ní quénehen de tachí ini ñayuu. Te ni cajesí ná jēe sáha de, chi tu jíca de jín yó, achí de.

<sup>39</sup> Te ni cahān Jesús jín de:

Ma cásí rō jeē sáha de. Chi ni ñn tēe jeē jín shví rí sáha de jniñu jéhnu, ma cúu nacahān de siquī rí.

<sup>40</sup> Chi tēe tu cáhán siquī yō, ín de jín yó. <sup>41</sup> Te na-ni ñayuu núu jeē siquí ruhū cuāha i vēsú ñn ñajin ndute

coho ró, siquĩ jeē cá candíje ró ruhū, ndaā ndije cúu jeē nihín i tahū i. Achí yá.

*Xeēn coo siquĩ ñáyuu quĩvi nuū cuéchi*  
(Mt. 18.6-9; Lc. 17.1-2)

<sup>42</sup> Te núu ñn sūchi lúlí yáha cándíje i ruhū, te núu quĩvi i cuéchi sáha na-ni ñayuu, te vāha ga núu ñi conuhnĩ ñn yōso cáhnu sucūn ñayuu ún, te quēe i chíji ndute mar nuú. <sup>43</sup> Te núu ndaha ró sáha jeē quĩvi ró cuéchi, vāha ga cahnde rō na quíhín, návāha tuá sáha ró cuéchi. Chí vāha ga jeē cóndee ñn-ni ndaha ró te quĩvi ró núu cotecu rō ñí cáni, vēsú jeē cóndee ndĩndúú ndaha ró te quĩvi ró infierno, nuū cayú ñuhūn jeē ma ndahvá cuĩti.

<sup>44</sup> Te yūcuán chí tu cájihĩ tĩndacú, te tu ndáhvá cuĩti ñuhūn. <sup>45</sup> Te núu jehē rō sáha jeē quĩvi ró cuéchi, suni vāha ga cahnde rō na quíhín, návāha tuá sáha ró cuéchi. Chí vāha ga jeē cóo cúhndu ró te quĩvi ró núu cotecu rō ñí cáni, vēsú jeē cóndee ndĩndúú jehē rō te quĩvi ró infierno, nuū cayú ñuhūn jeē ma ndahvá cuĩti. <sup>46</sup> Te yūcuán chí tu cájihĩ tĩndacú, te tu ndáhvá cuĩti ñuhūn. <sup>47</sup> Te núu tĩnūu ró sáha jeē quĩvi ró cuéchi, vāha ga tava ró na quíhín, návāha tuá sáha ró cuéchi. Chí vāha ga jeē quĩvi ró ñuu nuū ndácu Yaā Dios jniñu jíin ñn na tĩnūu ró, vēsú jeē cóndee ndĩndúú tĩnūu ró te quĩvi ró infierno. <sup>48</sup> Te yūcuán chí tu cájihĩ tĩndacú, te tu ndáhvá cuĩti ñuhūn.

<sup>49</sup> 'Chí nájñuhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuā sáha ññ. <sup>50</sup> Vāha íyó ññ, te núu ññ ún na náā jeē uhvuá, ¿te ndese nduu uhvuā tucu sáha ró? Núu súcuan te cuu

ró ñáyuu váha, nájñūhun íyó váha ñĩ. Te na cóyūcu váha ró jíín jnáhan ró. Achí yá jíín de.

*Siquī jeē ma stóo jnáhan tēe jíín ñahan*  
(Mt. 19.1-12; Lc. 16.18)

## 10

<sup>1</sup> Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jñūhun nuū i, nájñūhun sáha ya.

<sup>2</sup> Yūcuán na te jecu tēe grupo fariseo ni quecoo de nuū yā, chí cáconi de cotó ndee de ya núu ndese cahān yā. Te ni cacajñūhún de ya núu íyó ley jeē cuu ndusín ñn tēe jíín ñasihí de. <sup>3</sup> Te ni cahān yā jíín de:

¿Na jniñu ni ndacu Moisés nuū rō nde jenahán?

<sup>4</sup> Te ni cacahān de:

Moisés ni jēhe de jñūhun jeē cúvāha ñn acta jeē ndusín de jíín ña, te ndōo ña, áchí de.

<sup>5</sup> Te ni cahān Jesús jíín de:

Siquī jeē níhni ni rō jijnáhan ró, jeē yūcuan ní ndacu de jniñu yáha núu rō. <sup>6</sup> Te nde xīhna ñūhún, ná ni sáha Yaā Dios ndihí, chí tēe jíín ñahan ni sáha ya. <sup>7</sup> Jeē yūcuan cúu jeē stóo tēe tátá de náná de, te quijnáhan de jíín ñasihí de. <sup>8</sup> Te ñn na cuu ndindúú de, áchí Yaā Dios. Núu súcuan te tuá cúu uū jnáhan de, chí ñn na cúu. <sup>9</sup> Jeē yūcuan tu íyó váha jeē stóo jnáhan, chí jeē ni squijnáhan Yaā Dios cúu, áchí yá.

<sup>10</sup> Te tēe cáscuáha ún nuū ni quívicoo de vehe, te ni cacajñūhún tucu de ya siquī jñūhun ún. <sup>11</sup> Te ni cahān yā jíín de:

Núu ndé tée stóo de ñasihí de te condeca de inga ñahan, núu súcuán te cásiquí ndeē de ñasihí de. <sup>12</sup> Te núu ñin ñahan stóo ña yí ña te condeca ña inga tée, suni cásiquí ndeē ña de. Achí yá.

*Jeē ni jícān tahu Jesús jehē sūchi lúli*  
(Mt. 19.13-15; Lc. 18.15-17)

<sup>13</sup> Yūcuán na te ni quecoo ñayuu jíin sūchi lúli, jēē na sóo yá ndaha ya xinī i. Te tée cáscuáha jíin yá, ni cacahān de nuū ñáyuu vējicoo jíin i. <sup>14</sup> Te ni jito Jesús, te ni quitī ni yā, te ni cahān yā jíin de:

Cuāha jnūhun na quíjicoo sūchi lúli jíñā nuū rī, te ma cásí rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quívi ndaha Yaā andívi jeē ndacu ya jniñu nuū i. <sup>15</sup> Te jendaá cahán rī jíin ró, núu ñin ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñin sūchi lúli, ma quívi cuiṭi i ndaha ya, achí yá.

<sup>16</sup> Te ni nundee ya i, te ni soó yá ndaha ya xinī i, te ni jicān tahu yā jehē i jíñáhan i.

*Jnūhun tée cúca*  
(Mt. 19.16-30; Lc. 18.18-30)

<sup>17</sup> Yūcuán na te ni quihin tucu ya ichi cuahān yā. Te jínu ñin tée ni quee de, te ni jecuiñī yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihīn tahu na cotecu na nḥí cáni andívi? áchí de.

<sup>18</sup> Te ni cahān yā jíin de:

¿Naun cáhán rō jeē tée vāha cúu ri? Tú ni ñin tée vāha íyó, chí máá ñin-ni Yaā Dios. <sup>19</sup> Je jíni rō tācá jniñu ní ndacu Yaā Dios: Ma cosíquí ndeē jnáhan ró. Ma cáhni rō ndīyi. Ma sacuíhná ró. Ma

sajnúhún ró. Ma stahú ró jnáhan ró. Cuatáhú ró nuū tatá rō nuū naná rō. Achí yá.

<sup>20</sup> Te ni cahān tēe un jíin yá:

Tācá jniñu yáha je ni squícu ná ndé ná lulí ná, Maestro, achí de.

<sup>21</sup> Yūcuán na te ndáhú jíto ya nuū de jeē cúsi ni yā jíin de. Te ni cahān yā:

Íin na jniñu cúmanī sáha ró núu súcuan. Cuáhán te xīco ró ndihi jeē névāha ró, te cuāha ró núū ñáyuu ndahú. Te nde andiví cuāha ya jeē váha ndasí núū rō. Yūcuán na te quiji ró condiquīn rō ruhū, te cuāha ró jnúhun ndoho ró jnúndóho jeē siquí rī, achí yá.

<sup>22</sup> Te ná ni jini sōho de jnúhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

<sup>23</sup> Yūcuán na te Jesús ni ndacoto ya ní xiin ya, te ni cahān yā jíin tēe cáscuáha jíin yá:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de, achí yá.

<sup>24</sup> Te tēe cáscuáha jíin yá, yōhyo ni canaa ni de jeē ní cajini de jnúhun ni cahān yā. Te ni cahān tucu ya jíin de:

Séhē, ñáyuu ténuū xūhún, yōhyo yí quívicoo i ndaha Yaā Dios jeē ndacu ya jniñu nuū i. <sup>25</sup> Yachī gā yāha íin camello yaū yutícuí, vésú jeē quívi íin ñáyuu cucá ndaha Yaā Dios jeē ndacu ya jniñu nuū i, achí yá.

<sup>26</sup> Te víhyá gā ni canaa ni de cájini de, te ni cacajnúhun jnáhan de:

¿Ndé ñáyuu cúu jeē cácu núu súcuan?

<sup>27</sup> Te ni ndacoto ya nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, chi ndihi-ni jniñu cuu sáha ya, achí yá.

<sup>28</sup> Yūcuán na te ni cahān Pedro jíin yá:

Sāña jíjnáhan ná, ní castóo ná ndihi jeē cánevāha ná, te cāndiquīn na níhín, achí de.

<sup>29</sup> Te ni cahān Jesús:

Jendaá cahán rī jíin ró jíjnáhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē síquī ruhū jíin síquī jeē scáca i jnūhun jeē jnáma ri ñayuu, <sup>30</sup> núu súcuan te nanihín i ñn ciento gā jeē súcuan vijna, cúu vehe, cúu ñani, cúu cuāha, cúu náná, cúu sēhe, cúu ñuhun, te nde jíin jéē cóto xeēn ñayuu i. Te nde ñnga vida quiji te cotecu i ní cáni. <sup>31</sup> Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chi ndujéhnu i, achí yá.

*Jeē ni cáhān tucu ya jeē cúu yā*

*(Mt. 20.17-19; Lc. 18.31-34)*

<sup>32</sup> Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sñn tucu ya ndihúxí uū tée cáscuáha, te ni quejéé yá cástūhún tucu ya nuū de tāca jéē quíji síquī yā. <sup>33</sup> Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tée, nuū sutú cácujuhnu jíin núu tée cástéén tutu ley. Te ndonda de síquī rī jeē cúu rī, te squívi de ruhū nuū tée nación Roma jeē cáyūcú Jerusalén cāndacu jniñu. <sup>34</sup> Te tāca tée un sácata de nuū rī, te cani de

ruhū, te tesīhí de nuū rī, te sáá te cahni de ruhū. Te nuū uní quivī te natecu rī, achí yá.

*Jeē ni jícān Jacobo jín Juan ñn favor nuū yā  
(Mt. 20.20-28)*

<sup>35</sup> Yūcuán na te Jacobo jín Juan, ndindúú séhe Zebedeo, ni quecoo de nuū Jesús, te ni cacahān de: Maestro, cácuni na jéē sáha ní ñn jeē cacán na núū ní, achí de.

<sup>36</sup> Te ni cahān yā jín de:

¿Ndese cácuni rō jeē sáha ri jín ró? achí yá.

<sup>37</sup> Te ni cacahān de:

Cuāha ní jnūhun jeē cónēne ná xiin ní quivī ndujéhu ní, ñn ná lado váha ní, te inga ná lado jecó ní, achí de.

<sup>38</sup> Yūcuán na te ni cahān Jesús jín de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? achí yá.

<sup>39</sup> Te ni cacahān de:

Cuu sáha ná.

Te ni cahān yā jín de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri. <sup>40</sup> Te jeē cónēne ró lado váha ri jín lado jecó rí, nasūu rúhū cúu jeē cuáha jnūhun. Chi je íyó túhva cuu tāca tée jeē ní nacāji Tátá rī, te tēe un níhīn, achí yá.

<sup>41</sup> Te uxī gā tēe cáscuáha un, ní cajini de jnūhun yáha, te ni caquītī ni de nuū Jacobo jín Juan. <sup>42</sup> Te Jesús ni cana ya de, te ni cahān yā jín de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhin de jniñu nuū i, te máá de cáchí ndese coo. <sup>43</sup> Te máá ró jijnáhan ró, chi ma sáha ró súcuan. Chi núu ndé ñn ró cúní

cujéhnū, sa suhva cuajníñū ró núū jnáhan ró. <sup>44</sup> Te núū ndé ñn ró cúní cuu nuū, sa suhva sáha ró máá ró mozo nuū tāca jnáhan ró. <sup>45</sup> Chi suni súcuan sáha ruhū, Yaā ní nduu tēe, chi nasūu jēē véji ri jeē cuajníñū ñayuu nuū rī, chi sa suhva vēji ri jeē cuajníñū ri nuū ñáyuu. Te cuāha ri maá rí cuu rī návāha jnama ri cuehē ñayuu, achí yá.

*Jeē ní nasávāha ya Bartimeo tēe cuáá  
(Mt. 20.29-34; Lc. 18.35-43)*

<sup>46</sup> Yūcuán na te ni jinū yā ñuu Jericó jín tēe cáscuáha jín yá. Te sáá te ni quenda ya yūcuan jín de jín ñáyuu cuehē ndasí. Te Bartimeo tēe cuáá, sēhe Timeo, néne de yuhíchi, jícán de caridad. <sup>47</sup> Te ni jini de jnūhun jeē Jesús ñuu Nazaret vēji ya. Te ni quejéé de cána jee de:

Jesús Sēhe yucūn David, cundáhú ni ni sáña, áchí de.

<sup>48</sup> Te cuehē ñayuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

<sup>49</sup> Yūcuán na te ni jecuiñī Jesús, te ni cahān yā:  
Cana de na quíji de.

Te ni cacana i tēe cuáá un:

Ndeyí coo ni rō. Ndocuiñī, na quíhín yō, chi cána ya rohó, áchí i jín de.

<sup>50</sup> Yūcuán na te ni scāne de ticāchí de, te yachī ni ndocuiñī de, te ni jinū de nuū Jesús. <sup>51</sup> Te ni cahān yā jín de:

¿Na vé cuní rō jeē sáha ri jín ró?

Te máá de ni cahān de:

Maestro, jeē na ndúndijin tinūu ná cuní na, áchí de.

52 Te ni cahān Jesús jíin de:

Cuáhán núu súcuan. Ni candíje ró jeē cuu nasāvāha ri rohó, te jeē yúcuan ní nduvāha ró, áchí yá.

Te ni ndundijin-ni tinūú de, te ni ndiquīn de Jesús cuahān de jíin yá ichi ún.

*Jeē ni quāvi Jesús ñuu Jerusalén  
(Mt. 21.1-11; Lc. 19.28-40; Jn. 12.12-19)*

## 11

1 Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de.

2 Te áchí yá jíin de:

Cuángoo ñuu lulí íne ichi núú. Te núu ni quāvi-ni ró yúcuan, te nihīn rō ñin burro núhni tī, jeē ní ñin tēe ná tu coso de tī. Te ndají ró tī, quijicoo ró jíin tī. 3 Te núu ndé ñin cajnūhún naun cándají ró tī, te cachi rō: Máá Jítóho yō jíni ñúhún yá tī, te yachī natají yá tī ndiji tī, achí rō. Achí yá jíin de.

4 Te cuangoo de, te ni canihīn de burro un núhni tī yehyí núú quéhe nuū náquijnáhan ichi. Te ni candají de tī. 5 Te sava ñayuu cáhīn yúcuan ní cacahān jíin de:

¿Na vé cúu jeē casáha ró jeē cándají ró burro jíinā? achí i.

6 Yūcuán na te ni cacahān de nájñūhun ni cachi Jesús. Te ni casiáá i tī vējicoo de jíin tī. 7 Te ni ndecoo de jíin tī nuū Jesús, te ni casoó de sahma de síquī tī, te ni jecosō yā tī. 8 Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

<sup>9</sup> Te ñayuu cuangoo ichi núú jíín ñáyuu cuangoo ichi yátá, cácana jee i:

Yōhyo cújéhnu ya. Yōhyo vāha Yaā cúu Yaā jeē véji jíín jniñu máá Jítóho yō Yaā Dios. <sup>10</sup> Te yōhyo luu coo, chi je yajni ndacu ya jniñu nájnūhun ni ndacu jíí yō rey David. Te yōhyo cújéhnu máá Yaā Dios. Achí i.

<sup>11</sup> Te ni quiví Jesús ñuu Jerusalén, jíín ini templo cáhnu. Te ni jito ya nuū tācá ndajniñu yúcu ní yúcuan. Te ni quenda ya cuahān yā ñuu Betania jíín ndihúxí uū de, chi je ni ini.

*Jeē ni cáhān yā nuū yújnu higo  
(Mt. 21.18-19)*

<sup>12</sup> Te inga quiví ún, nuū ní quenda ya ñuu Betania cuahān yā jíín de, te jíí yā sōco. <sup>13</sup> Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihín yā ndehē caji yā. Te tú na vé ni níhín yā, chi máá ndaha-ni ín. Chí nasūu tiempo ndehē cúu. <sup>14</sup> Yūcuán na te ni cahān yā nuū yujnu ún:

Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíín yá ni cajini de jeē súcuan ni cahān yā.

*Jeē ní quenehen ya ñayuu ini templo  
(Mt. 21.12-17; Lc. 19.45-48; Jn. 2.13-22)*

<sup>15</sup> Te ni najinū yā jíín de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quiti te cánaxico núú ñáyuu jeē socō i. Te ni scotúú ndeyi ya tāca mesa tēe cástáyí xūhún, jíín silla tēe cáxícó paloma. <sup>16</sup> Te tu ní jéhe ya jnūhun

jeē yáha ñayuu ini templo jíin ndajniñu ndíso i. <sup>17</sup> Te ni steén yā jnūhun nuū i, áchí yá:

Yósó núū tútu ií jeē cahán Yaā Dios: Vehe ri chi vehe nuū cájicān tahuñ ñayuu tācá nación cúu, áchí yá. Te máá ró jijnáhan ró chi nájñūhun yaū cava ñacuñna ní canasáha ró, áchí yá.

<sup>18</sup> Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéñnu ga maá yá vēsú maá de, chi tāca ñáyuu yōhyo cácusñi ni i cájini i jnūhun stéén yā. <sup>19</sup> Te jeē cuácuaa, te ni quenda ya ñuu Jerusalén cuahān yā.

### *Jeē ni íchī nundēhe higo*

*(Mt. 21.20-22)*

<sup>20</sup> Te jenéhen inga quivī ni nayāha ya jíin de cuahān yā. Te ni cajito de jeē nundēhe higo un je ni ichī nde yoho. <sup>21</sup> Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núū, te vijna je ni ichī caján, áchí de.

<sup>22</sup> Te ni cahān Jesús jíin de:

Candíje ró jéē sáha Yaā Dios jeē jicán rō. <sup>23</sup> Chi jendaá cahán rī jíin ró, núu ndé ñáyuu cahān i jeē cújiyo yucu yáha quihñ nde nuū mar, te núu tú nacani siquí ni i, chi sa suhva candíje i jeē cóo nájñūhun ni cahān i, yūcuán na te cundaā jeē ni jicān i. <sup>24</sup> Jeē yúcuan cáhān rī jíin ró, tāca jéé cacán tahuñ rō, te núu candíje ró jéē nihín rō, te nihín rō. <sup>25</sup> Te jeē cájicān tahuñ rō, te cone cáhnu ni rō nuū ñáyuu casáha cuēchi siquí rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró. <sup>26</sup> Chi núu tú cone cáhnu ni rō nuū jnáhan

ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, áchí yá.

*Siquī jeē ndíso jniñu Jesús*  
(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujeñnu jíin tée cástéén tutu ley Yaā Dios jíin tée jéñnu cándacu jniñu, ni quecoo de nuū yā. <sup>28</sup> Te ni cacajñuhún de ya:

¿Nde ní nihīn jniñu ró jéē sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? áchí de.

<sup>29</sup> Te ni cahān Jesús:

Suni ruhū, cajñuhun rí rohó ñn jñuhun jíjnáhan ró. Te núu cuu stío cuñí rō, yūcuán na te cachi rī nuū rō ndé ní nihīn jniñu rī jeē sáha rī jniñu yáha. <sup>30</sup> ¿Nde ñn ni tee jniñu siquī Juan jeē ni scuándute de? ¿A Yaā Dios chí táca téé? Cachi nuū rī, achí yá.

<sup>31</sup> Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un siquī Juan, te cahān de jíin yó: Núu súcuan ¿te najehē tu ní cácañde ró de? <sup>32</sup> Te núu cahān yō jeē ñáyuu ni catee jniñu un siquī de, te quitī ni ñayuu nuū yō, achí de cácañ maá de.

Chi cáyūhú de jeē quitī ni ñayuu, chi ndivii i cácañde i jeē téé ni nacani jñuhun Yaā Dios ni cuu ndije Juan. <sup>33</sup> Jeē yúcuan ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha rī jniñu yáha, áchí yá.

*Jnūhun yátá síquī tēe néé cásájniñu nuū uva  
(Mt. 21.33-46; Lc. 20.9-19)*

## 12

<sup>1</sup> Te ni quejéé yá cahán yā jnūhun yátá jíin de jíjnáhan de:

Íin tēe ni nachuhun de cuehē uva, te ni jesi de corral, te ni sáha de ñn nuū cūhun ndehē un táxín. Te ni sáha de ñn vehe súcún návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

<sup>2</sup> Te máá tiempo ndutútú uva, te ni tají de ñn mozo de cuanuquihin sava uva nuū tée cásájniñu ún. <sup>3</sup> Te tēe un ní cajñi de mozo un, te ni cacani de i, te ni canatajé de i cuanuhun i súcuan-ni. <sup>4</sup> Yūcuán na te tēe chíí uva un ní tají tucu de ñnga mozo cuahān. Te tēe cásájniñu un ní cajēhe de yuū xinī mozo un, te ni castújé de, te ni cacahān ndevāha de nuū. <sup>5</sup> Te tēe chíí uva ni tají tucu de ñnga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tēe chíí uva, íyó ñn sēhe de jeē maní ndasí de jíin. Te jeē sándihí na ni tají de sēhe de un cuahān nuū tée cásájniñu. Te jéni ni de: Tēe ún chi cuatáhú de jíjnáhan de nuū séhe ri. <sup>7</sup> Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí. <sup>8</sup> Te ni cajñi de i, ni cajehni de i, te ni cascáne de i ñnga lado. Achí yá.

<sup>9</sup> Yūcuán na te ni cajñūhun yá de:

Núu súcuan ¿te ndese sáha tēe chíi uva un? Ndihi de te cahni de tēe cásájniñu ún, te cuāha de ñuhun cáa uva un núu inga sava tēe sájniñu nuū.

<sup>10</sup> ¿Te á ná tu cahu ró jnúhun yáha jēe yosó núu tutu iñ, jeē ruhū cúu nájñuhun ññ yuū? Chi áchí tutu: Yuū jeē ní casquéhichī tēe cájeni vehe, yuū yáha nduu jeē quítuu vehe.

<sup>11</sup> Máá Jítoho yō Yaā Dios ni sáha ya súcuan, te cánaa ni yō jíto yó jniñu yáha. Achí tutu, achí yá.

<sup>12</sup> Yūcuán na te ni canducú de modo jññ de ya. Chi ni cajecūhun ni de jeē siquī maá de cúu jññhun yátá ní cahān yā siquī tēe cásájniñu nuū uva jíñ tēe cájeni vehe. Te siquī jeē cáyūhú de jeē quítū ni ñayuu, te ni castóo de ya te cuangoo de.

### *Siquī xúhun renta*

*(Mt. 22.15-22; Lc. 20.20-26)*

<sup>13</sup> Yūcuán na te ni catajī de sava tēe grupo fariseo jíñ tēe grupo Herodes cuangoo de nuū yā, ndúcú de ndese sáha de návāha cahān yā ññ jññhun jeē nihín de cuēchi siquī yā. <sup>14</sup> Te ni quecoo de, te ni cacahān de jíñ yá:

Maestro, cájini na jēe tēe cáhān ndaā cúu ní, te tu yúhú ní jeē cahān ni ññ ñayuu siquī ní. Chi tu sáha ní cuenta ndese cúu ññ ññ i, chí ññuú-ni sáha ní jíñ i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jññ nación yō, chí tuú? ¿A chúnaa yō, chí má chúnaa yō? Achí de jíñ yá.

<sup>15</sup> Te máá yá jiní yā jeē stahú-ni de, te ni cahān yā jíñ de:

¿Najehē cájito ndee rō ruhū? Cuāha ñn xūhún na cóto ri, achí yá.

<sup>16</sup> Te ni cajēhe de xūhún. Te ni jito ya, te ni cajnūhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

<sup>17</sup> Yūcuán na te ni cahān yā jíin de:

Núu súcuan te nacuāha ró núu rey un jēē yíhi cuenta nuū de, te nacuāha ró núu Yaā Dios tāca jēē yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajnūhún de síquī jeē nátecu ndīyi  
(Mt. 22.23-33; Lc. 20.27-40)*

<sup>18</sup> Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiñi ndīyi. Te ni cacahān de jíin yá síquī ñn jnūhun, achí de:

<sup>19</sup> Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuññi i nuū ndīyi ñani de, achí tutu. <sup>20</sup> Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihī de, te tú sēhe de ní íyo. <sup>21</sup> Te tēe uū ni naquihin de ña, te suni ni jihī de, te tú sēhe de ní íyo. Te suni súcuan tēe unī. <sup>22</sup> Te ndihúxá de ni condeca de ña, te ni ñn de tú sēhe de ní íyo. Te jeē sándihí te suni ni jihī ñahan ún. <sup>23</sup> Núu súcuan te núu na nátecu de jíjnáhan de quiñí nátecu ndīyi, ¿te ndé

¿in de cuu ña ñasihí de? Chi ndihúxá de ni condeca de ña. Achí de jíin yá.

<sup>24</sup> Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahān tutu iī, ni tu cájini rō jeē iyó poder Yaā Dios jeē nastécu yā ndīyi. <sup>25</sup> Chi quivī nátecu ndīyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andiví. <sup>26</sup> Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. <sup>27</sup> Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Yōhyo cástívi ró jnūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios  
(Mt. 22.34-40)*

<sup>28</sup> Te ni quee in tēe stéén tutu ley Yaā Dios, te ni jini de jeē castíchí jnáhan tēe un jíin Jesús. Te ni jini de jeē váha ni nastió cuíñi yā jnūhun. Te ni cajnūhún de ya:

¿Ndé in cúu jnūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

<sup>29</sup> Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá in-ni ya iyó. <sup>30</sup> Núu súcuan te coo manī ndasí ró jíin máá Jítóho rō Yaā Dios, nde jnāá ndasí ró sáha ró ndihí jeē cúsi ni yā, nde jíin ini jíin ánuá rō, jíin ní jeē níjnūní rō, jíin ní fuerza rō. Yāha cúu jniñu ndácu ya jeē cánuú ndasí gá. <sup>31</sup> Te jniñu uū jeē ní ndacu ya, suni súcuan cáhán: Cundáhú ni

rō jnáhan ró nájñūhun cúndáhú ni rō maá ró. Tuá inga jñūhun ndácu jniñu cánuú gá iyó, chi suu máá jéé yáha-ni. Achí yá jíin de.

<sup>32</sup> Yūcuán na te ni cahān tēe stéén tutu ley jíin yá:

Váha ni cahān ní, Maestro. Chi ndaā chi íyó ñin-ni Yaā Dios, te tuá na inga yā iyó. <sup>33</sup> Te cánuú jéé coo manī ndasí yó jíin yá nde jíin ini jíin ánuá yō, jíin ní jeē níjnūní yō, jíin ní fuerza yō, te cundáhú ni yō jnáhan yó nájñūhun cúndáhú ni yō maá yó. Te cánuú ndasí gá jeē yáha vēsú jeē cáhmu yó quiiti jíin táca gá jeē socó yō nuū yā. Achí de jíin yá.

<sup>34</sup> Yūcuán na te ni jini Jesús jeē váha ni stió cuíñí de, te ni cahān yā jíin de:

Je yajni cuu quívi ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñin ga de, tuá ni chúndeyí ni de cajñūhún de ya.

*Siquí jeē cúu Cristo sēhe yucūn David  
(Mt. 22.41-46; Lc. 20.41-44)*

<sup>35</sup> Te stéén Jesús jñūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David? <sup>36</sup> Chi máá David suhva ni cahān de jñūhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiiji:

Cucōo ró lado váha ri nuū cujéhnu ró,  
te na sáha ri jeē quende rō poder tāca jéé cájito uhū  
rohó.

Achí Yaā Dios. Achí David. <sup>37</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i tāca jnúhun cáhān yā.

*Jeē ni cáhān yā jeē iyó cuéchi de jýnáhan de  
(Mt. 23.1-36; Lc. 11.37-54; 20.45-47)*

<sup>38</sup> Te stéén yā jnúhun, te ni cahān yā jíin i:

Coto má candíje ró tāca tēe cástéén tutu ley. Chi cácusī ni de cáñuhun de sahma cáni jeē steén jeē cujéhnú de, cájica cuu de jíin. Te cánujnahan ni de jeē cahān yíñúhún ñáyuu jíin de ini calle. <sup>39</sup> Te cánujnahan ni de cucōo de nuū silla yíñúhún gá ini vehe iī sinagoga, jíin silla yíñúhún gá nuū víco cáyeji ñayuu. <sup>40</sup> Te cáquende de vehe ñahan ní caquendōo ndáhú. Te nahán cájicān tahu de návāha caní ni ñayuu jeē tú na cuéchi de. Tēe yáha jíinahan de chi xeēn gā ndoho de castigo. Achí yá.

*Jeē ni sócō ñahan viuda xūhún  
(Lc. 21.1-4)*

<sup>41</sup> Te iin quivī néne Jesús ini templo ichi núú tāca yéjnū nuū cásocō i xūhún. Te jíto ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún. <sup>42</sup> Te ni quee iin ñahan viuda jeē ndóho ndáhú. Te ni chuhun ña uū centavo lulí ini yejnū ún. <sup>43</sup> Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahān rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca ñáyuu cucá. <sup>44</sup> Chi tācá i ni casocō i jeē ni ndóo siquī xúhun cuéhē i. Te ñahan yáha, vēsú ndahú

ndóho ña, te ni chuhun ndihi ña jeē cótecu ña. Achí yá jíin de.

*Jeē ní cachi yā jeē náā templo  
(Mt. 24.1-2; Lc. 21.5-6)*

## 13

<sup>1</sup> Te ni quenda Jesús ini templo cáhnu, te ñn tēe scuáha jíin yá ni cahān de:

Maestro, condēhe ní ná luu jíto tāca vehe yáha jéē cúu templo, jíin tāca yúu jeē ní cuvāha, áchí de.

<sup>2</sup> Te ni cahān yā jíin de:

Tāca vehe náhnu yāha jéē cájito ró, chí ma cóso jnáhan ga ni ñn yuū, chí ndihi jnanū. Achí yá.

*Na seña coo nuū cuácuyajni ndihi ñayiví  
(Mt. 24.3-28; Lc. 21.7-24; 17.22-24)*

<sup>3</sup> Te ni jehēn yā jíin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun síin de ya:

<sup>4</sup> Castūhun ní nuū ná, ¿ndé quiví coo tāca jéē ní cachi ní jéē coo? ¿Te na seña coo núu cuacuyajni squícu tāca jéē ni cahān ní? áchí de.

<sup>5</sup> Te ni cahān yā jíin de:

Coto ró jéē ma stahú ni ñn de róhó. <sup>6</sup> Chi quijicoo cuehē tēe jeē stahú jíin shví rí. Máá rí cúu Cristo, achi de. Te súcuan stáhú de cuehē ñayuu.

<sup>7</sup> Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndihi ñayiví. <sup>8</sup> Chi ndonda nación siquí inga nación, te ndonda ñuu siquí inga ñuu jeē cuajnáhan. Te cháha chúcuan jnáa, te coo jnamā, te ndonda ñayuu siquí jnáhan i.

Te tāca jéē yáha cácuu jnūndóho quejéé xíhna ñúhún gá.

<sup>9</sup>Te condito ró máá ró, chi nastúu i róhó núū tāca tóhō, te ini tācá vehe iī sinagoga canī i róhó. Te quindecā i sava ró núū tācá gobernador jíin núū tāca rey, te cahān i cuēchi siquī rō siquī jeē cáccandíje ró rúhū. Te súcuān te cuu nacani ró jnúhun ri nuū de. <sup>10</sup>Te jíni ñúhún jéē xíhna gā cuitē núu jnúhun nuū tācá nación ndese jnáma ri i, te sáá te ndíhi quivī. <sup>11</sup>Te núu ni cajni de róhó cuángoo de jíin ró nuū tāca tóhō, te ma nácani ni rō xíhna gā ndese stíó cuiñí rō nuū de te cācu ró. Chi máá hora un te máá Yaā Dios cuāha ya jnúhun nuū rō ndese cahān rō, te jnúhun ún cahān rō. Chi nasūu máá ró cúu jeē cahān, chi Espíritu Santo cúu jeē cahān. <sup>12</sup>Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tátá jíin náná jeē cahni. <sup>13</sup>Te tāca ñáyuu quiñí ni i nuū rō jeē siquī ruhū. Te ñayuu cuiñí ñihin jíin jnúhun ri nde quiñí jínu, chi cācu i.

<sup>14</sup>Te Daniel, tēe ni nacani jnúhun Yaā Dios, ni tee de jnúhun ñin tēe néé jéē quiñí. Te róhó jéē cácahu tutu ún, na jécūhun ni rō. Chi ñin quiñí te cuni rō jeē sáha ndevāha de jeē stívī de tācá ndajníñu iī ini templo, te cuiñí de nuū tú na ley cuiñí de. Te núu cuni rō jeē súcuān cúu, te ñayuu cáyūcú región Judea, na cúnu i caa i yucu quingoo i. <sup>15</sup>Te ñayuu cáyūcu núū quéhe, ma ndívī i ini vehe jeē quénehen i ndajníñu i, chi cánuú cunu yachī i návāha cācu i. <sup>16</sup>Te ñayuu cáhīin nuū itu, ma ndíji i vehe jeē quiñin i sahma i. <sup>17</sup>Te quiñí ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña. <sup>18</sup>Te cacān tahú rō jeē

ma quíji jnūndóho un jēē cunu ró máá tiempo cúun yuhvā. <sup>19</sup> Chi jeē quejéé un te coo cuehē jnūndóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndíhi jnūndóho ún te ni ma cóo ga jeē súcuan. <sup>20</sup> Te núu tú nastíyi máá Jítóho yō Yaā Dios tiempo jnūndóho ún, te ni ñin ñayuu ma cácu cuiti i. Te jeē siquí ñáyuu cá candíje jeē ní nacāji ya, jeē yúcuan nastíyi ya tiempo un.

<sup>21</sup> Núu súcuan te núu ñin ñayuu cahān jiín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jēē cahán i. <sup>22</sup> Chi canecoo tēe cástáhú te cahān de jeē Cristo cúu de, chí cáhān de jeē téē nácani jnūhun Yaā Dios cúu de. Te sáha de jniñu jéhnú jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. <sup>23</sup> Te ndito na cóo ni rō, chi je ni castūhun rí nuū rō vijna nde ná tu coo.

*Ndese coo quivī ndiji Yaā ní nduu tēe  
(Mt. 24.29-35, 42-44; Lc. 21.25-36)*

<sup>24</sup> Te quivī ún, núu je ni ndíhi jnūndóho ún, te cujnúú níándii, te yoō ma ndíi gā. <sup>25</sup> Te ningoo quimi ín andiví. Te tāca jēē ín andiví chi quisí i. <sup>26</sup> Yūcuán na te coto ñayuu nuū maá rí, Yaā ní nduu tēe, ndiji ri jiín vícō, te condiso ri cuehē poder, te yōhyo luu kujéhnú ri. <sup>27</sup> Yūcuán na te tají rí ndajéhé rí quinastútú yá ñayuu ní nacāji ri ndicúún lado ñayiví, nde nuū ndíhi ñayiví te nde nuū ndíhi andiví.

<sup>28</sup> Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. <sup>29</sup> Te suni súcuan núu ni cajini rō jeē ní quejéé cúu tācá jniñu jeē ni cáhān

rī, yūcuán na te na jécūhun ni rō jeē ní cuyajni quivī ndíji ri, te yachī coo. <sup>30</sup> Jendaá cahán rī jín ró jeē ma cúu ndihī ñayuu jeē cóto jnūndóho ún, chi nde squícu ndihī jniñu ún. <sup>31</sup> Andiví jín ñáyiví chi naa, te tāca jnúhun cáhán rī chi ma náā, chi ndihī squícu.

<sup>32</sup> Te quivī jín hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ñn ni Tátá rī cúu jeē jiní.

<sup>33</sup> 'Núu súcuan te na cócuhun ni rō tāca jnúhun yáha, te ndito na cóo ni rō, te cacān tahú rō, chi tu cájini rō na quivī ndiji ri. <sup>34</sup> Chi coo nájnūhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñn ñn de. Te ni ndacu de jniñu nuū tēe ndíto yéhyí jéē na cóndito de. <sup>35</sup> Te suni súcuan róhó jínáhan ró, ndito na cóo ni rō. Chi cúu ri nájnūhun jitohe vehe ún, te tu cájini rō na hora ndiji ri, á jéē cuácuaa, chí ñuú, chí jéē cána líhli, chí jénéhen. <sup>36</sup> Chi ñn sanaa-ni te ndiji ri, te coto ró jéē ma nánihīn rī rohó jéē tu ndíto ró. <sup>37</sup> Te jnūhun cáhán rī jín ró jijnáhan ró, suni cáhán rī jín ndivii ñayuu: Ndito na cóo ni rō jijnáhan ró. Achí yá.

*Jeē ní casquijnáhan de jnūhun jeē jn# de Jesús  
(Mt. 26.1-5; Lc. 22.1-2; Jn. 11.45-53)*

## 14

<sup>1</sup> Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yñi. Te sutū cácujuhnu jín tēe cástéén tutu ley, ni canducú de modo ndese jn# de Jesús jín jnúhun stáhú, te cahni de ya. <sup>2</sup> Te ni cacahān de:

Ma jñi yó de máá quívi víco, chi ndonda ñayuu siquī yō, achí de.

*Jñuhun ñahan jeē ní chuhun perfume xinī yā*  
(Mt. 26.6-13; Jn. 12.1-8)

<sup>3</sup> Te íne Jesús ñuu Betania vehe Simón, tēe ni ndoho cuehyī stehyú. Te níni yéji yā staā, te ni quee ñin ñahan nuū yā, ndáhá ña ñin frasco yuū luu jeē ñúhun aceite perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xinī yā. <sup>4</sup> Te sava tēe cáhīin yūcuan ní caquitī ni de, te ni cacahān de:

¿Najehē cúu jeē náā saá-ni perfume jiñā? <sup>5</sup> Chi cuu xícó yahu yó víhyá gā unī ciento denario, te cuāha yo núū ñayuu ndahú núú, achí de.

Te ni cacahān sōó de jíin ña.

<sup>6</sup> Te ni cahān Jesús:

Ma stáhān rō ña. ¿Naun cásáha ró jēe nácani uhū ni ña? Chi ñin jniñu váha cúu jeē ni sáha ña jíin rí. <sup>7</sup> Chi níni coyūcu ñáyuu ndahú jíin ró, te núu cácu ni rō te cuu sáha vāha ró jíin i. Te ruhū chi tuá condee rī jíin ró. <sup>8</sup> Chi ni sáha ña ndiñi jeē cuu sáha ña jeē maní ña jíin rí. Chi nde ná tu quindūji ri te je ni sātūhva ña ruhū jeē ní chuhun ña perfume ruhū. <sup>9</sup> Jendaá cahán rī jíin ró jeē ní cáhnu ñayīvi ndé-ni cúu nuū cuité núu jñuhun jeē jnáma ri ñayuu, suni nacani i jñuhun jeē ni sáha ñahan yáha, návāha cocuhun ni ñayuu ña, achí yá.

*Jeē ní nastúu Judas yā*  
(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácu jéhnū, ni sándaā de jíin jēe nastúu de Jesús nuū jijnáhan. <sup>11</sup> Te

nuū ní cajini sōho sutū un jēē cahán de, te ni cacusī ni, te ni cajejnūhun jeē cuáha xūhun núū de. Te nde quivī un ní nducú de modo ndese nastúu de ya.

*Jeē ní jequin yā Cena yā*

*(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jēē quisátūhva ná cuxíni ní vico pascua? achí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñn tēe ndiso quiyi ndute. Te condiquin rō de quihin rō jíin de. <sup>14</sup> Te vehe jeē ndívi de, yūcuan cáhān rō jíin tée chíí vehe: Achí máá Maestro: ¿Ndé ñn cúu cuarto vehe ní cuāha núú ní núū cuxíni ya vico pascua jíin tée cáscuáha jíin yá? achi rō. <sup>15</sup> Te máá de stéen de ñn cuarto cáhnu nde xinī véhe jeē je íyó túhva. Te yūcuan sátūhva ró jēē cuxíni yó, achí yá jíin de.

<sup>16</sup> Te cuangoo tēe cáscuáha ún, te ni jinūcoo de ñuu, te ni canihin de nájnūhun ni cahān yā jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuaa, te ni quee ya jíin ndihúxí uū de.

<sup>18</sup> Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñn róhó jéē yéji jíin rí, nastúu ro rúhū, achí yá.

19 Yūcuán na te ni cacucuíhyá ni de, te ná ñn ná ñn de ni cacajnūhún de ya:

¿A sáña cúu? áchí ñn de.

Te suni súcuan inga de:

¿A sáña cúu? áchí ñn ñn de.

20 Te ni cahān yā jíin de:

Ñn jeē uxí uū rō jeē cáyeji cáhnu jíin rí ñn cohō, suu nastúu ruhū. 21 Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jnūhun ri nuū tútu ñ. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

22 Te níni cáyeji de jíin yá, te ni quihin ya pan, te ni nacuatáhu yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chí yāha cúu yiqui cúñu rī, achí yá.

23 Yūcuán na te ni quihin ya ñn copa ndūxi uva, te ni nacuatáhu yá, te ni jēhe ya ni cajihí ndihí de.

24 Te ni cahān yā jíin de:

Yāha cúu ññī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. 25 Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quivī ndacu Yaā Dios jniñu ní ñayiví, te sáa te coho tucu ri jíin ró jijnáhan ró. Achí yá.

*Jeē ní cachi yā jeē yūhu Pedro cahān de jeē jiní de ya*

*(Mt. 26.30-35; Lc. 22.31-34; Jn. 13.36-38)*

26 Te ni jita ya ñn yaa ñ jíin de jijnáhan de. Te ni quenda ya cuahān yā jíin de nde yucu Olivos.

27 Yūcuán na te ni cahān yā:

Ndivii rō nayūhu ró jeē siquí ruhū jecuáā vijna. Chi suhva je yósó jnúhun ri nuū tútu iī, ni cahān Yaā Dios: Cuāha ri jnúhun jeē cáhni ñayuu tēe ndíto lanchi, te lanchi un cuítē núu tī jeē yūhu tí, achí. <sup>28</sup> Te jeē nátecu rī, te xīhna ruhū cosnūu rí quihīn rī región Galilea, te sáá te najinūcoo ró, achí yá.

<sup>29</sup> Yūcuán na te ni cahān Pedro:

Vesú ndihī de na náyūhú de, te máá ná chi ma náyūhú cuítē ná, achí de jíin yá.

<sup>30</sup> Te ni cahān yā jíin de:

Jendaá cahán rī jíin ró jeē jecuáā vijna, nde ná tu cana líhli uū jíinu, te yūhu ró jeē jniī ñayuu rohó, te unī jíinu cahān rō jeē tu jíin rō ruhū, achí yá.

<sup>31</sup> Te ni cahān teyí de jíin yá:

Vesú núu cuu na jíin ní, te ma cahán cuítē na jéē tu jíin na níhín, achí de.

Te suni súcuan ni cacahān ndihī de.

*Jeē ni jíicān tahu yā nuū huerto Getsemaní*

*(Mt. 26.36-46; Lc. 22.39-46)*

<sup>32</sup> Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī cacān tahu rī, achí yá.

<sup>33</sup> Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxíi ni yā jeē quíji jnūndóho siquí yā. <sup>34</sup> Te ni cahān yā jíin de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

<sup>35</sup> Te ni jica ya jecu gā, te ni jecuiñī yití yá ni jequin ya nuū yā nuū ñúhun. Te ni jíicān tahu yā

nuū Yaā Dios jeē núu cuu te ma ndóho ya jnūndóho jeē quejéé quiji siquī yā. <sup>36</sup> Te suhva ni cahān yā:

Tátá maá ná, ndihī-ni jniñu cuu sáha máá ní. Te tejiyo ní jnūndóho yáha jéē ma quiji siquī ná. Te nasūu jéē cuní maá ná, chi jeē cuní maá ní na cóo, áchí yá.

<sup>37</sup> Te ni ndee yā nuū ndinúní tée cáscuáha jíin yá, te ni jito ya jeē cáquixī de. Te ni cahān yā jíin Pedro:

Simón, ¿á quixí rō? ¿A tu ní cánda ró condito ró jíin rí vēsú ñn hora? <sup>38</sup> Coó ndito ni rō te cacān tahu rō jeē chindéé ñáhán yá rohó jeē ma sáha ró cuéchi jeē coto ndee jeneé rohó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

<sup>39</sup> Te ni jehēn tucu ya, ni jicān tahu yā, te suni jnūhun yúcuan ní cahān yā. <sup>40</sup> Te ni ndee ya nuū de, te ni jito ya jeē cáquixī tucu de, chi yōhyo cájiī de máhná. Te tuá ni cánihīn de jnūhun stío cuñí de nuū yā. <sup>41</sup> Te ni ndee yā jeē vuelta unī, te ni cahān yā jíin de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jni tēe cáhīyo cuéchi ruhū. <sup>42</sup> Ndocuiñī jijnáhan ró, chi je vēji tēe nastúu ruhū, te quihīn yō jíin de. Achí yá.

### *Jeē ní cajñi de Jesús*

*(Mt. 26.47-56; Lc. 22.47-53; Jn. 18.2-11)*

<sup>43</sup> Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujuhnu jíin tēe cástéén tutu ley jíin tēe jéhnu cándacu jniñu, ni catají de tēe ún. <sup>44</sup> Te Judas,

tēe nástúu ya ún, je ni jēhe de ñn seña nuū tēe un jíjnáhan, chí ni cachi de:

Tēe jeē téchūhu rí un cúu. Te jnií ró jíjnáhan ró quihīn rō jíín, te ma siaá cuiti rō, achí de.

<sup>45</sup> Te ni quee de nde nuū Jesús, te ni cahān de jíín yá:

Maestro, Maestro, achí de.

Te ni techūhú de ya. <sup>46</sup> Te tāca gá tēe un ní cajnií de ya, te cuango de jíín yá.

<sup>47</sup> Te ñn tēe íne jíín yá ni tava de espada de, te ni jehnde de sōho ñn mozo maá sūtū cujéhnu ga. <sup>48</sup> Te ni cahān Jesús jíín ñáyuu cuehē ún:

¿Te va tēe cuíhná cúu ri jeē véjicoo ró jíín espada jíín yujnu jnií ró rúhū jeē súcuan? <sup>49</sup> Tāca quívī ni ine ri jíín ró jíjnáhan ró ini templo cáhnu, ni steén rī jnūhun, te tu ní cájnií ró rúhū. Te súcuan cásáha ró návāha na squícu jeē cahán tutu iī, achí yá.

<sup>50</sup> Yūcuán na te ndihī tēe cáscuāha jíín yá, ni castóo de ya, ni cajinu de cuango de.

### *Tēe suchí jeē ní jinu*

<sup>51</sup> Te ñn tēe suchí, ndíquín de ya cuahān de jíín yá. Te ndí de máá ñn sahma cuitá. Te ni cajnií tēe ún de. <sup>52</sup> Te máá sahma cuitá un ní canihīn. Te ni jinu máá ñni de cuahān de.

*Jeē ní indichi Jesús nuū junta tēe cácujuhnu ga*  
(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yūcuán na te ni jinūcoo de jíín Jesús nuū sutū cujéhnu ga. Te tāca sūtū cácujuhnu jíín tēe jéhnu cándacu jniñu jíín tēe cástéén tutu ley, ni candutútú de. <sup>54</sup> Te Pedro chí jíicá-ni ndíquín de ya, te ni jinū

de nde ini patio sutū cujéhnu ga. Te ni cucōo de jín táca policía, násaā de ñuhūn.

<sup>55</sup> Te sutū cácujuhnu jín ndihí tēe cásáha junta cujéhnu ga, ni canducú de cuēchi síquī Jesús, chí cahni de ya cácuni de. Te tu ní cánihīn de. <sup>56</sup> Chí cuehē de ni cacahān yaá síquī yā, te tu ní quíjnáhan jñūhun ni cacahān de. <sup>57</sup> Yūcuán na te ni candocuiñī sava de, te ni catee de cuēchi síquī yā, achí de:

<sup>58</sup> Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quivī te nacani de inga jeē násūu jín ndaha tēe cuvāha, áchí de. Achí jínáhan.

<sup>59</sup> Te ni jñūhun yáha tu ní quíjnáhan tucu jeē cácahān de síquī yā.

<sup>60</sup> Yūcuán na te sutū cujéhnu ga ni ndocuiñī de nuū ñáyuu cuehē ún, te ni cajnūhún de Jesús:

¿Naun tu cáhán cuiñī rō? ¿A iyó ndáā jeē cácahān tēe yáha síquī rō? achí de.

<sup>61</sup> Te máá yá tu ní cáhán cuiñī yā, chí tú na vé ni stío cuiñī yā. Te sutū cujéhnu ga ni cajnūhún tucu de ya:

¿A máá ró cúu Cristo, Sēhe Yaā vāha jeē cujéhnu? achí de jín yá.

<sup>62</sup> Te ni cahān yā:

Suu ri cúu. Te coto ró jēe ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jín vícō, achí yá.

<sup>63</sup> Yūcuán na te sutū cujéhnu ga ni jehnde de sahna de jeē quití ndasí ni de, te ni cahān de:

¿Ndé jini ñúhún gá yō testigo núu súcuan? <sup>64</sup> Chí je ni cajini ró jēe cahān de jñūhun ndevāha jeē quití

ni Yaā Dios, chi sáha de máá de Sēhe Yaā Dios. ¿Te ndese cájeni ni rō? Achí de.

Te ndihí de ni cacahān jeē na cúu yā.

<sup>65</sup> Te sava de ni catesihí de nuū yā, te ni cajesi de sahma nuū yā, te ni cacani de ya. Te cácahān de jíin yá:

Cachi ndé ñn cúu jeē ní caní rōhó, áchí de.

Te tāca tée policia ni cacani de nuū yā.

*Jeē ní cachi Pedro jeē tu jíin de ya*

*(Mt. 26.69-75; Lc. 22.56-62; Jn. 18.15-18, 25-29)*

<sup>66</sup> Te íne Pedro ini patio ichi chíji nuū cáhīn de jíin Jesús. Te ni quee ñn ñahan jéjníñu vehe sutū cujéhnū ga ún. <sup>67</sup> Te ni jito ña nuū de jeē néne de násaā de yuñúhún. Te ni jito vāha ña nuū de, te ni cahān ña:

Róhó chi suni ni jica ró jíin Jesús, tēe ñuu Nazaret, achí ña.

<sup>68</sup> Te máá de tu ní cáchi de, chi ni cahān de:

Tu jíin rī de, ni tu jíin rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli. <sup>69</sup> Te ñahan jéjníñu un ní jito tucu ña nuū de, te ni quejéé ña cáhán ña jíin ñáyuu cáhīn yūcuán:

Tēe yáha suni jnáhan tāca tée un cúu, áchí ña.

<sup>70</sup> Te máá de tu ní cáchi tucu de. Te ni cuñúu jecu gā, te ñáyuu cáhīn yūcuan ní cacahān tucu i jíin Pedro:

Jendaá ndije jeē suni jnáhan de cúu ró, chi tēe Galilea cúu ró, te ñnuú-ni cáhán rō jíin de jíin náhan de. Achí i.

<sup>71</sup> Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíin rī tēe un jéē cácahān rō jnūhun de, áchí de.

<sup>72</sup> Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jíinu, te yūhu ró te cahān rō unī jíinu jeē tu jíiní rō ruhū. Te ni nacani ni de siquī jnúhun ún, te ni ndahyū de.

*Jeē ní indichi Jesús nuū Pilato  
(Mt. 27.1-2, 11-14; Lc. 23.1-5; Jn. 18.28-38)*

## 15

<sup>1</sup> Te jeē ní cundijin, te sutū cácujuhnu ni candutútú de jíin tēe jéhu cándacu jniñu, jíin tēe cástéén tutu ley, jíin ndihí tēe cása ha junta cujéhu ga, te ni casquínáhan de jnūhun. Te ni cajihni de Jesús, te cuangoo de jíin yá nuū Pilato, tēe cúu gobernador. <sup>2</sup> Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnuhun cáhán rō.

<sup>3</sup> Te sutū cácujuhnu un ní cacahān de cuehē cuēchi siquī yā. <sup>4</sup> Te Pilato ni cajnūhún tucu de ya:

¿Naun tu cáhán cuítí rō? ¿A tu jíiní ró jéē cuehē cuēchi cácahān de siquī rō? achí de.

<sup>5</sup> Te tu ní cáhán cuítí yā ni ñn jnúhun jíin de. Te nahán ní naa ni Pilato ndéhé de nuū yā.

*Jeē ní cundaā jeē cúu yā  
(Mt. 27.15-31; Lc. 23.13-25; Jn. 18.38-19.16)*

<sup>6</sup> Te íyó costumbre Pilato jeē quiví víco un siáá de ñn tēe íne vecāa, núu na-ni tēe cácuñi ñayuu. <sup>7</sup> Te íyó ñn tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndīyi. <sup>8</sup> Te ni quecoo ñayuu cuehē, te ni cacahān

i jíin Pilato jeē na sáha de nájñuhun íyó costumbre de. <sup>9</sup> Te ni cahān Pilato jíin i:

¿A tu cáculi rō jeē siaá rī tēe cúu Rey rohó ñáyuu hebreo? achí de.

<sup>10</sup> Súcuān ni cahān de, chi cúni de siaá de Jesús. Chi je ni jecūhun ni de jeē ní cacucúésún ni tāca sūtū un cájito de ya, te jeē yúcuān ní quijicoo jíin yá nuū de. <sup>11</sup> Te sutū cáculjéhnun un ní cascáhán de ñáyuu cuehē un jéē váha ga na cáculi i jeē siaá Pilato Barrabás. <sup>12</sup> Yūcuān na te ni cajñuhún tucu Pilato:

Núu súcuān ¿te ndese cáculi rō jeē sáha ri jíin tēe jeē cáculi rō jeē cúu de Rey rohó ñáyuu hebreo? achí de jíin i.

<sup>13</sup> Te ni cacana jee i:

Cata caa ní de jicā cruz, na cúu de, achí i.

<sup>14</sup> Te ni cahān Pilato:

¿Na cuēchi ni sáha de núu súcuān?

Te ñáyuu un ní cacana jee tucu i:

Cata caa ní de jicā cruz, na cúu de, achí i.

<sup>15</sup> Te Pilato cúni de jeē na cúsi ni ñáyuu jíin de, te ni siaá de Barrabás. Yūcuān na te ni ndacu de jniñu jeē na cáni tācá soldado Jesús, jíin jéē cata caa de ya jicā cruz.

<sup>16</sup> Yūcuān na te soldado un cuángoo de jíin yá ini patio palacio, jeē sácata de nuū yā. Te ni canastútú de ndihi jñáhan de. <sup>17</sup> Te ni cachuhun de ya ñin sahma cuehé ndíhi jéē cúu sahma rey. Te ni casáha de ñin corona iñu, ni cachuhun de xinī yā. <sup>18</sup> Yūcuān na te ni cacana de:

Nacā jeē váha rey cúu Rey ñáyuu hebreo, achí de.

<sup>19</sup> Te ni cacani de yujnu xinī yā, te ni catesihí de nuū yā, te ni cajecuiñi yití de nuū yā, casáha de jeē chiñuhún de ya. <sup>20</sup> Te nuū ní cuu ni casácata

de nuū yā, te ni catava de sahma cuehé ndíhí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

*Jeē ní cacata caa de ya jicā cruz*

*(Mt. 27.32-44; Lc. 23.26-43; Jn. 19.17-27)*

<sup>21</sup> Te ñn tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejníñu soldado un de jeē cóndiso de cruz yā.

<sup>22</sup> Te cuango de jíin yá ñn lugar nuū naní Gólgota, jeē cuní cahān Lugar Yiqui Xíní. <sup>23</sup> Te ni cajēhe de vino jeē ni sácā núu jíin sūje uvuā jeē cóho ya, te tu ní jíhi ya. <sup>24</sup> Te ni cacata caa de ya jicā cruz. Te ni casáha de sorteo jeē siquí ndese nihīn ñn ñn de sahma ya.

<sup>25</sup> Te cahīñ ni cacata caa de ya. <sup>26</sup> Te jñuhun ni catee de xinī cruz cahán na siquí ni jihī yā: Yāha cúu Rey ñayuu hebreo, achí. <sup>27</sup> Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá. <sup>28</sup> Te ni squícu jñuhun cáhán tutu iī: Ni casquíjnáhan de ya jíin tēe cásáha néé, achí.

<sup>29</sup> Te ñayuu cáyāha yūcuán cáscuícó i xinī i, te cácahān neé i:

Jājaān. Róhó chi cáhán rō jeē cánu rō templo cáhnu, te nuū uní quivī te nucondichi sáha ró.

<sup>30</sup> Núu súcuan te jnama ró máá ró, te nuu ró jicā cruz viī, achí i.

<sup>31</sup> Te suni súcuan ni cacahān catá sutū cácujuhnu jíin tēe cástéén tutu ley, te achí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? <sup>32</sup> Núu na cúni yō jeē

Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnáhan de.

Te tēe cándita caa jíin yá, suni súcuan ni cacahān neé de.

*Jeē ni jihī Jesús*

*(Mt. 27.45-56; Lc. 23.44-49; Jn. 19.28-30)*

<sup>33</sup> Te nuū ní cuu cahuxī uū, te ni cunee ñí cáhnu nde cahunī. <sup>34</sup> Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

<sup>35</sup> Te sava ñayuu cáhīn yūcuan, ní cajini i jnūhun ún, te ni cacahān i:

Cuni nahín, chi cána de xinī Elías, tēe ni nacani jnūhun Yaā Dios jenahán, achí i.

<sup>36</sup> Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiiji Elías nasnúu de, achí de.

<sup>37</sup> Te máá Jesús ni cana jee ya, te ni jihī-ni ya.

<sup>38</sup> Yūcuán na te sahma ndíta caa jeē ndihyú cuarto īi ini templo cáhnu, ni ndatā sava sava nde xinī te nde nuū jehé. <sup>39</sup> Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, achí de.

<sup>40</sup> Te suni cáhīn sava ñahan, cándēhe jícá ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé. <sup>41</sup> Te ñahan yáha ní candiquīn ña ya, ni cajejníñu ña nuū

yā nde náa jíca ya Galilea. Te suni cáhīn cuehē gā ñahan jeē ní jéngoo jíín yá ñuu Jerusalén.

*Jeē ní quindūji Jesús*

*(Mt. 27.57-61; Lc. 23.50-56; Jn. 19.38-42)*

<sup>42</sup> Te ni ini quiṽi ún. Te quiṽi sátūhva cúu, chi sajnē cúu quiṽi ndétātú. <sup>43</sup> Te ni quee José, tēe ñuu Arimatea. Te cúu de ñn tēe cújéhnu nuū junta cújéhnu ga. Te suni ñúhun ni de jeē quiṽi jeē ndacu Yaā Dios jniñu. Te tu yúhú de chi ni quiṽi de nuū Pilato, ni jicān de yiqui cúñu Jesús. <sup>44</sup> Te Pilato chi náa ni de jeē yachí ni jihī yā. Te ni cana de capitán, te ni cajnūhún de tēe un núu je ni jihī yā. <sup>45</sup> Yūcuán na te ni cucáhnú ni de jeē ni cáhān capitán jíín de, te ni jēhe de jnūhun jeē quihin José yiqui cúñu yā. <sup>46</sup> Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quindūji ndīyi, jeē ní caan jíicā ñn cava. Te ni jesi de ñn yuū yuhu yáú un. <sup>47</sup> Te María ñuu Magdala, jíín María naná José, ni cajito ña nuū ní cachindūji de ya.

*Jeē ní natecu Jesús*

*(Mt. 28.1-10; Lc. 24.1-12; Jn. 20.1-10)*

## 16

<sup>1</sup> Te ni ini quiṽi ndétātú, te María ñuu Magdala, jíín María naná Jacobo, jíín Salomé, ni cajeen ña tācá perfume jeē quíchuhun ña yiqui cúñu yā. <sup>2</sup> Te jenéhen quiṽi domingo, jeē ní cane niāndii, te ni jinūcoo ña nuū ní yindūji ya. <sup>3</sup> Te cácahān ña:

¿Nde níhīn yō tēe tejiyo yuū ndihyú yuhu yáú? áchí ña.

<sup>4</sup> Te ni candacoto ña, te ni cajito ña jeē jé ni cujiyo yuū cáhnu un cuáhān. <sup>5</sup> Te ni quivícoo ña ini yaū ndīyi. Te ni cajito ña ñn ndajéhé Yaā Dios jeē cáa nájñūhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña. <sup>6</sup> Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhi jicā cruz. Tuá yā yāhá, chi je ni natecu yā. Yāhá condēhé ró nuū ní cachindūji de ya. <sup>7</sup> Cuánungoo te cachi rō nuū tēe cáscuáha jíin yá, jíin núū Pedro, jeē xíhna gā maá yá jinū Galilea, te sáá te najinūcoo de. Te yūcuán coto de nuū yā, nájñūhun ni cahān yā jíin de nde saá, áchí yá jíin ña.

<sup>8</sup> Yūcuán na te ñahan un ní quendacoo ña nuū ní yindūji ya, te cájino ña cuangoo ña. Chi quísi i ña jeē cáyūhú ña. Te tu ní cáccachi cuiti ña nuū ní ñn, chi cáyūhú ña.

*Jeē ní nane Jesús nuū María ñuu Magdala  
(Jn. 20. 11-18)*

<sup>9</sup> Te Jesús ni natecu yā jenéhen quiví domingo. Te xíhna gā ni nane ndijin yā nuū María ñuu Magdala, ñahan jeē ní quenehen ya uxā tachī ini. <sup>10</sup> Te cuahān ña cuacastūhún ña nuū tāca tēe ni cajica jíin yá jeē ní nane ya nuū ña. Te cáccuúhyá ni de te cándahyū de. <sup>11</sup> Te nuū ní cajini de jñūhun jeē ní jito ña nuū yā jeē técu yā, te tu ní cáccandíje de jñūhun cáhān ña.

*Jeē ní nane ya nuū uū tēe cáscuáha jíin yá  
(Lc. 24.13-35)*

<sup>12</sup> Yūcuán na te ni quendacoo uū jñáhan tēe ún, cájica de cuahān de ichi rancho, te sñn modo ni nane ndijin yā nuū de. <sup>13</sup> Te ni canandicó de, ni

cacastūhún de nuū tāca gá jnáhan de. Te ni tu ní cácañdije tucu jnáhan de jeē cácahān ndindúú de.

*Jeē ní tejníñu ya de nacani de jñūhun*  
(Mt. 28.16-20; Lc. 24.36-49; Jn. 20.19-23)

<sup>14</sup> Te cúcuéé gá te ni nane ndijin yā nuū ndihúxí ñin de jeē cáyūcú de mesa cáyeji de staā. Te ni cahān yā nuū de, chi ñihni ni de jeē tu cácañdije de jeē cácahān jnáhan de un, jéē ní natecu yā ni cajito de ya. <sup>15</sup> Te ni cahān yā jín de:

Cuángoo jínáhan ró ñí ñayiví, te nacani ró jñūhun ri nuū tāca ñayuu ndese jnáma ri i. <sup>16</sup> Te ñayuu candije te cuandute i, chi cācu i. Te ñayuu tú candije, chi jnahnū ndetū i. <sup>17</sup> Te ñayuu candije, sáha i tācá jniñu jéñnu yáha jeē steén jeē iyó rí jín i: Jín síhví rí quenehen i tachī ini ñayuu. Te cahān i tijni yuhu jéé. <sup>18</sup> Te núu ni jñi sanaa i coō, chí núu ni jihi i veneno, te ma sáha daño jín i. Te suni soó i ndaha i síquī ñayuu cácuñu, te nduvāha. Achí yá jín de.

*Jeē ní ndaa ya cuanuhun yā andiví*  
(Lc. 24.50-53)

<sup>19</sup> Yūcuán na te nuū ní ndihni ni cahān maá Jítóho yō jín de jínáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéñnu ya. <sup>20</sup> Te máá de ni quendacoo de, ni canacani de jñūhun ya tāca ladō ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéñnu jeē steén jeē iyó ndáa jñūhun cánacani de. Te ni cuu. Amén.

**Nuevo Testamento en mixteco**  
**New Testament in Mixtec, Atatláhuca (MX:mib:Mixtec,**  
**Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

**Copyright Information**

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Atatláhuca

**© 1973, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
9665e546-39d0-5bd5-8b10-38916a94951f